

2020

ABERRI
ESTATUTUAK





ABERRI ESTATUTUAK 2020

*Bilboko Euskalduna Jauregian 2020ko abenduaren 10ean egindako
Ezohiko Aberri Batzarrak onetsiak*

A U R K I B I D E AOr.

PRINTZPIO OROKORRAK.....	5
ATARIKO TITULUA	7
I. TITULUA.– ALDERDIKIDEAK	8
II. TITULUA.– e-ERAKUNDEA.....	16
III. TITULUA.– EAJ-PNVren ANTOLAKETA	16
I. kapitulua.– PRINTZPIO OROKORRAK	16
II. kapitulua.– URIETAKO, HERRIALDEETAKO ETA ABERRIKO ERAKUNDEAK	18
<i>Lehenengo atala: Urietako erakundeak</i>	18
<i>Bigarren atala: Herrialdeetako erakundeak.....</i>	19
<i>Hirugarren atala: Aberri-erakundea.....</i>	20
III. kapitulua.– EUZKADIZ KANPOKO ERAKUNDEAK.....	20
IV. kapitulua.– EUZKO GAZTEDE.....	21
IV. TITULUA.– BATZARRAK	22
I. kapitulua.– URIETAKO BATZARRAK.....	22
II. kapitulua.– HERRIALDEETAKO BATZARRAK	23
III. kapitulua.– ABERRI BATZARRA	25
IV. kapitulua.– BATZAR NAGUSIA	30
V. TITULUA.– ALDERDIKIDEEI IRITZIA ESKATZEA.....	31
VI. TITULUA.– BURU BATZARRAK.....	33
I. kapitulua.– URI BURU BATZARRAK.....	33
II. kapitulua.– HERRIALDE BURU BATZARRAK	34
III. kapitulua.– EUZKADI BURU BATZARRA	36
VII. TITULUA.– ORGANO JUDIZIALAK, ETA BERME ETA KONTROLEKOAK	38
I. kapitulua.– ORGANO JUDIZIALAK.....	38
<i>Lehenengo atala: Aspektu orokorrak</i>	38
<i>Bigarren atala: Urietako organo judizialak</i>	38
<i>Hirugarren atala: Herrialdeetako epaimahaia.....</i>	39
<i>Laugarren atala: Justiziako Aberri Epaimahaia</i>	40
II. kapitulua.– BERMEAK ETA KONTROLA.....	41

III. kapitulua.– KONTU-AZTERTZAILEAK ETA KONTU-AZTERTZAILEEN ABERRI BATZORDEA	42
<i>Lehenengo atala: Aspektu orokorrak</i>	42
<i>Bigarren atala: Urietako kontu-aztertzaileak</i>	42
<i>Hirugarren atala: Herrialdeetako kontu-aztertzaileak.....</i>	43
<i>Laugarren atala: Kontu-aztertzaileen Aberri Batzordea</i>	43
VIII. TITULUA.– KARGU PUBLIKOAK	44
I. kapitulua.– UDALERRIETAKO KARGU PUBLIKOAK	44
II. kapitulua.– HERRIALDEETAKO KARGU PUBLIKOAK	45
III. kapitulua.– ABERRIKO KARGU PUBLIKOAK.....	46
IX. TITULUA.– ALDERDIAREN BARNEKO KARGUETARAKO ETA KARGU PUBLIKOETARAKO HAUTAGAIK AUKERATZEA	48
X. TITULUA.– KARGUEN EGIKARITZAREN MUGAK	49
I. kapitulua.– AGINTALDIEN IRAUPENA	49
II. kapitulua.– BATERAEZINTASUNAK	49
<i>Printzipio orokorrak</i>	49
<i>Lehenengo atala: Bateriaezintasun osoak.....</i>	50
<i>Bigarren atala: Alderdiaren barneko karguen arteko bateriaezintasunak.....</i>	50
<i>Hirugarren atala: Alderdiaren barneko karguen eta kargu publikoen arteko bateriaezintasunak</i>	51
<i>Laugarren atala: Bateriaezintasunak kentzea.....</i>	53
III. kapitulua.– KARGUAK EZ METATZEA	54
XI. TITULUA.– EAJ-PNVren ANTOLAKETA EKONOMIKOA	55
XII. TITULUA.– KOMUNIKABIDEAK ETA IRUDIAREN BITARTEKOAK.....	58
XIII. TITULUA.– ABERRI ESTATUTUEN ERREFORMA.....	58
XEDAPEN GEHIGARRIAK	59
AZKEN XEDAPENAK	60
ERANSKINAK: – IKURRA, SIGLAK, WEBGUNEA ETA POSTA ELEKTRONIKOKO HELBIDEA	63
– BATERAEZINTASUNEN LAUKIA	64

PRINTZIPIO OROKORRAK

1. SABINO ARANA GOIRik sortutako Euzko Alderdi Jeltzaleari (EAJ-PNVri) JAUNGOIKOA ETA LEGE ZARRA goiburutik datorkio izena. Esaera horrek hauek uztartzen ditu: bizitzeko eta ulertzeko modu bat, eta euskal nazioaren baieztapena. Nazio horren izate politikoa haren subiranotasun nazional osoa berreskuratzearekin batera adieraziko da.
2. EAJ-PNVk honelaxe definitzen du bere burua: euskal alderdi demokratikoa, parte-hartzailea, plurala, akonfesionala eta gizatiarra, aurrerabideari eta gizakiaren onerako diren zibilizazioaren aurrerapen guztiei irekia.
3. EAJ-PNVk Euzkadi du aberri, nazio eta lurralde; lurralde hori Pirinioetako bi aldeetara zabaltzen da, eta berean euskal herria bizi da. Ikurrina du bandera, eta Euzko Abendaren Ereserkia da Euzkadiren ereserki nazionala.
4. EAJ-PNVk euskara du euskal hizkuntza nazional, eta erantzukizun nazionala eskatzen du hura normalizatzeko; normalizazio horren oinarriak euskal herritarren hizkuntza-eskubideen babes eta bultzada izan behar du, eta EAJ-PNVko arduradun publikoek eta Alderdiaren barneko arduradunek euskal herritarren zerbitzuan jardun behar dute.

EAJ-PNVk bere egiten ditu hizkuntza-normalizazio eraginkorraren printzipio gidariak: euskararen aldeko ekintza positiboa, euskara baita euskaldunen hizkuntza propioa, gutxiengoduna eta gutxitua, eta aurrerakortasuna, zeina beharrezkoa baita eraginkortasunez jarduteko.
5. EAJ-PNVk bere egiten du emakumeen eta gizonen arteko ordezkaritza parekidea Alderdiaren barneko karguak eta kargu instituzionalak aukeratzeko prozesu guztietan.

6. EAJ-PNVk xede hauek ditu:

- a) Euskal proiektu politiko jeltzalea gauzatzeko tresna izatea.
- b) Euzkadiko herritarren aurrerabide eta garapen handiena lortzea gizartean, ekonomian, politikan, kulturen eta gainerako arlo guztietan, betiere elkartasuna, jasangarritasuna eta aukera-berdintasuna abiapuntutzat hartuz.
- c) Balioak eta praktikak sustatzea eta zabaltzea, zertarako eta emakume eta gizonen arteko berdintasun osoan oinarritutako gizartea lortzen laguntzeko.
- d) Euskal herritarren prestakuntza eta partaidetza politiko aktiborako bide izatea.
- e) Gune izatea, proiektu politiko jeltzalea eta haren estrategia politikoa etengabe hausnartu eta berritzeko.
- f) Botere politikora heltzea, batez ere, instituzioetan egonez, horiek baitira haren proiektua errealitate bihurtzeko bide.
- g) Iritzi publikoan etengabe jardutea, herritarren eta gizarte-taldeen partaidetza suspertzea, betiere euskal gizarteak bere etorkizunaren eraikuntzan duen protagonismoa errespetatuz.
- h) Gidalerro politikoak finkatzea, eta berak instituzio publikoetan dituen ordezkariak bideratu, lagundu eta kontrolatzea.
- i) Karguei bereziki eta alderdikideei oro har portaera jakin bat eskatzea, zeinaren oinarria izango baita haien eguneroko zereginetan zintzotasuna, erantzukizun etikoa eta gobernu ona izatea.

Alderdiko kargu publikoen kudeaketa gardentasun-printzipioan oinarrituko da; horren irismena, gutxienez, unean-unean lege bidez zehazten dena izango da.

ATARIKO TITULUA

1. artikulua.— Euzko Alderdi Jeltzalearen hizkuntza euskara da. Horretaz gainera, beste hizkuntza batzuk ere erabili ahal izango dira, gizarte-beharrizanei, tokian tokiko beharrizanei eta gobernu hobe baten beharrizanei erantzuteko.

2. artikulua.— EAJ-PNVk ikurrina du euskal bandera nazional, euskal herriak, Legebiltzarrak eta Jaurlaritzak hartua; honako ezaugarriak ditu ikurrinak: hondo gorria, itxoroski berdea eta gurutze zuria gainetik.

3. artikulua.— Era berean, hauexek dira EAJ-PNVren ezaugarriak:

1. Haren ikurra, eranskinean emana, bi elementuk osatzen dute eta hauek dira: anagrama, koloreko bolak irudikatua, eta logotipoa, EAJ-PNV hitzak osatua; horrek babesgune bat izango du EAJ-PNVren markaren inguruan; gune horrek ez du beste elementu eraldatzaile ikusgarririk izango, ez testurik, ez marrazkirik, ezta apaingarrikerik ere. EAJ-PNVren irudi ikusgarriak haren historia osoan ordezkatu duten betiko kolore berdea, zuria eta gorria eramango ditu. Anagramak berdetik gorrira doan degradatua eramango du, eta logotipoak kolore beltza izango du.

Bozketa-orrietan, baimenduta dago ikurraren kolore bakarreko bertsioa erabiltzea; bertsio horrek tinta bakarreko ikurra ordeztu du, eta positiboan edo negatiboan joan daiteke.

2. EAJ-PNVren egoitza soziala eta helbidea Euzkadi Buru Batzarraren egoitza soziala eta helbidea izango dira, alegia, Alderdiaren sortzailearen jaiotetxekoak: 48001-Bilbo (Bizkaia), Ibañeiz de Bilbao kaleko 16a.

3. Webgunea eta helbide elektronikoa eranskinean daudenak dira.

4. Haren jarduketa-eremua hauexek dira: Europa, espainiar estatua, autonomia-maila, foru- eta udal-eremua edota frantziar estatuko eremu baliokidea; izan ere, Alderdia eremu geografiko horietan egingo diren hauteskunde-prozesuetan aurkeztuko da, betiere unean-unean aplikagarri den legeriaren arabera.

I. TITULUA

ALDERDIKIDEAK

4. artikulua.— EAJ-PNVkoa izateko, ezinbesteko baldintza da alderdikidea izatea.

EAJ-PNVko alderdikideak konpromisoa hartuko du, erakundearen barruan euskal askapen nazional eta soziala lortzen laguntzeko, eta eragile aktiboa izango da EAJ-PNVren barne-funtzionamenduan bezala haren ekintza politikoan.

5. artikulua.— EAJ-PNVren alderdikidea izateko baldintza hauek bete behar dira:

a) Pertsona fisikoa izatea, adinduna eta jarduteko gaitasuna ez mugatua ez murriztua izatea.

b) Beste ezein alderdi politikoren alderdikidea ez izatea.

c) EAJ-PNVren ideien aurkako izaera politikoko zein politiko-sozialeko beste erakunde batekoa ez izatea.

d) EAJ-PNVren ideologia onartu eta haren proiektu politikoaren defentsa publikoarekin konpromiso pertsonala hartzea.

e) Organo eskudunari alderdikidetzat eskatzea, haren onespena jasotzea eta Alderdikideen Erregistro Nazionalean alderdikide gisa erregistratua izatea.

6. artikulua.— 1. Alderdikidetzat eskatu eta gauzatu beharko da eskatzailea bizi den lekuko uri erakundean edo, hori izan ezean, hurbilenekoan egin beharko da. Arrazoiak izanez gero, beste uri erakunde batean jaso ahal izango da alderdikidetzat, baldin eta uri buru batzar biak ados badaude; uri erakunde biok idatziz eskatuko dute gertatutakoaren berri agerraraz dadila Alderdikideen Erregistro Nazionalean.

2. Alderdikidetze-eskabidea behar bezala bete eta sinatu egingo du interesdunak, alderdikidetzat gutxienez bi urte daramaten beste alderdikide biren babesa beharko du, eta uri erakundeko alderdikideei jakinaraziko zaie. Aldi berean, uri buru batzarrak eskabidearen kopia igorriko dio berari dagokion herrialde buru batzarrari eta Alderdikideen Erregistro Nazionalean formalizatuko du

alderdikidetze-eskabidea edo herrialde buru batzarrari eskatuko dio bere izenean egin dezala.

3. Alderdikidetza onartzeko edo ukatzeko, uri buru batzarrak ebazpena hartuko du hiru hilabeteko gehieneko epearen barruan, eta eskatzaileari eta abal-emaila biei jakinaraziko zaie. Alderdiaren barneko hauteskunde-prozesuetan zehar epe hori eten egingo da eta ezin izango da ebazpenik eman. Ebazpenik ematen ez bada, eskabidea ukatutzat joko da. Onarpen eta ukapen guztiak, azken hauen barruan isilekoak sartuta, herrialde buru batzar eskudunari jakinaraziko zaizkio. Ukapenen kasuan, horien zio diren arrazoiak ere eman beharko dira.

4. Edozein alderdikidek uri batzarrera eraman dezake uri buru batzarrak alderdikidetza onartzeko edo ukatzeko hartutako erabakia; uri batzar horrek bi hilabeteko gehieneko epean hartu beharko du ebazpena.

5. Egoitza aldatzen bada, alderdikideak aldaketa horren berri emango dio uri buru batzarrari; honek, era berean, helbide berriaren arabera eskumena duen uri buru batzarrari bidaliko dio haren fitxa. Alderdikidearen uri erakunde berriak derrigor onartu beharko du bera, antzinatasuna errespetatuz.

Salbuespenez, egoitza aldatzen duen alderdikideak lehenengo uri erakundean jarraitu ahal izango du, baldin eta erakunde biak ados badaude, eta hori agerrarazi beharko da Alderdikideen Erregistro Nazionalan.

6. EAJ-PNV nahita utzi duten alderdikideek euren uri erakundearen bitartez bakarrik eskatu ahal izango dute Alderdian berriz sartzea, Alderdian baja benetan eman zuten egunetik bi urte igaro ondoren. Ondorio horietarako, ez da borondatezko bajatzat hartuko, alderdikidearen lanbidearekin edo lanpostuarekin zerikusia izan dezaketen lege-eskakizunengatik egiten dena.

Egoitza aldatu badute, ezinbestekoa izango da haiek baja eman zuten uri erakundearen txostena.

7. Uri erakunde bat zatitzen bada, zatiketa horrek jotzen dituen alderdikideak erregistratuko dira ezarritako mugapearen arabera eurei dagokien erakundean, salbu eta, bidezko arrazoiengatik, uri buru batzar biek elkarren adostasunez baimentzen badute horren aurkakoa egitea eta idatziz eskatzen badute Alderdikideen Erregistro Nazionalan baimen horren idatzoharra egitea.

7. artikulua.— 1. Alderdikidetza-eskabidea herrialde buru batzar bakoitzak ebatziko du ondoko kasu hauetan:

a) Eskatzaileak aurretik EAJ-PNVtik kanporatu dituztenean, edo, Alderdian baja emanda, horri kalte handiren bat egin diotenean. Kasu honetan, kanporatzearen edo bajaren egunetik hiru urte igaro behar izango dira, berriz sartzea eskatu ahal izateko.

Alderditik kanporatuak izan badira, herrialde buru batzarrak organo judizial zehatzaile eskudunari eskatuko dio zehapen horren oinarri izan diren arrazoi guztien txosten osoa. Kasu bietan, eskatzailea lehen zegoen uri buru batzarrari edo sartu nahi duen berriari, edo biei, eskatuko die idatzizko txosten bat, Alderdian baja eman zuenetik zer-nolako jardun politikoa agertu duen erakusteko.

b) Eskatzaileak beste alderdi bateko alderdikideak izan direnean, edota beste alderdi politiko baten eskutik hauteskundeetara aurkeztuak izan direnean edo kargu publiko bat egikaritzeko aukeratuak izan direnean.

c) Uri buru batzarrak, berak ezohikotzat jotzen dituen arrazoiak direla eta, txostena herrialde buru batzarrari igortzen dionean.

d) Aurretik ere alderdikidetza eskatu eta hori ukatu zitzaionean. Herrialde buru batzarrak entzun beharko du zer dioen uri buru batzarrak, eskabidea ebatzi baino lehen.

2. Herrialde buru batzarraren ebazpenaren aurka, edozein alderdikidek aurkez diezaioke errekurtsua herrialde epaimahaiari.

8. artikulua.— Alderdikideen Erregistro Nazionala eta akta-liburua kudeatzea Euzkadi Buru Batzarraren idazkaritzaren ardurapean egongo da.

9. artikulua.— 1. Alderdikide bakoitzari bere uri buru batzarrak alderdikidetza txartela eskuratuko dio. Era berean, euskarri fisiko edo digitalean emango zaizkio estatutu eta erregelamenduak, une horretan EAJ-PNVren proiektu politikoa finkatzen duten dokumentuak eta EAJ-PNVk unean-unean indarrean izango duen *Compliance Penal* edo Delituen Prebentzio Plana.

2. Prestakuntza-ikastaroak emango dira, alderdikideek EAJ-PNVren planteamendu ideologikoak, programa eta antolaketa zein diren jakingo dituztela bermatzeko.

10. artikulua.— Alderdikide guztiak berdinak dira eskubide eta betebeharretan, estatutu hauek ezartzen dituzten mugen kalterik gabe.

11. artikulua.— Alderdikidearen eskubideak honako hauek dira:

1) Bere alderdikidetza egoki garatzeko beharrezkoak diren prestakuntza eta informazioa jasotzea.

2) EAJ-PNVren organo artezkariengandik informazioa jaso eta haien arreta eskatzea, horretarako jarritako antolaketa-bideen bitartez, Alderdiaren antolaketari eta jarduerari eragin diezaieketen arazo guztiei buruz.

3) Bere uri erakundearen batzarretan sortzen diren eztabaida, hausnarketa eta bozketetan parte hartzea, hitz egiteko eta boto emateko erabateko askatasuna duelarik.

4) Aukeratzea eta aukeratua izan ahal izatea EAJ-PNVren erakundeko edozein kargu, izendapen edo hautapeneterako.

5) Aukeratzea eta aukeratua izan ahal izatea kargu publiko baterako hautagai.

6) EAJ-PNVren berme-organoa eta organo judizial eskudunetara jotzea.

7) EAJ-PNVren erakundearen barneko bideak erabiltzea bere ideiak askatasunez adierazteko. Iritzi horiek argitaratzen edo zabaltzen ez badira, interesdunak organo eskudunaren justifikazio egokia jasoko du.

12. artikulua.— 1. Alderdikidearen eskubideak oso-osorik eskuratuko dira, bai Alderdiaren barneko karguetarako hautagarria izateko, bai EAJ-PNVn sartzea eskatzen dutenak abalatu ahal izateko, alderdikidetzaren urte bi, gutxienez, igaro eta gero, lanbide edo lanpostuarekin loturiko lege-eskakizunen ondoriozko bajaren osteko altaren kasuetan izan ezik; kasu horietan altak dakar alderdikideari baja mota hori hartu zuen unean zegozkion eskubide guztiak berreskuratzea.

2. Alderdikidetzaren bi urteko antzinatasunaren eskakizuna ez da aplikatuko uri erakunde bateko karguetarako hautagaia izateko, sortu berri diren erakundeak izan eta beste uri erakunde baten zatiketarik ez datozenean.

3. Buru batzarrek kontratatzen dituzten langileei eskatuko zaie gutxienez bi urte alderdikidetuta egotea; izan ere, langileok eskura

izan ditzakete alderdikideen erregistroak, aktak, datu ekonomikoak edota buru batzarrak berak isilpekotzat hartzen duen dokumentazioa.

13. artikulua.— Alderdikidearen betebeharrak honako hauek dira:

1) Aberri, herrialde eta uri mailetako estatutuak, eta, era berean, horiek garatzen dituzten erregelamenduak zaintzea.

2) EAJ-PNVren organoek baliozkotasunez hartutako erabakiak betetzea, haren erakundearen diziplina betetzea eta haren helburuak lortzen laguntzea.

3) EAJ-PNVren proiektu politikoa, haren antolaketa eta barne-funtzionamendua zein diren jakin eta haiek zabaltzea.

4) EAJ-PNVren *Compliance Penal* edo Delituen Prebentzio Plana edo ordenamendu juridikoaren aurkako portaerak prebenitzeko eta gainbegiratzeko sistema jasoko duen dokumentua ezagutzea, zaintzea eta betetzea.

5) EAJ-PNVren ekintza politikoa modu aktiboan parte hartzea.

6) Bere uri erakundearen batzarretara eta EAJ-PNVk deitzen dituen ekitaldietara joatea, salbu eta, lehenengo kasuari dagokionez, organo judizial eskudunak zehapen bat ezarri badu eta zehapen horrek batzarretara joatea galarazten badu.

7) EAJ-PNVk aurkezten dituen bere hautagaiei, edota alderdikideak izan ez baina EAJ-PNVk bermatzen dituenei botoa ematea.

8) EAJ-PNVren barruan onartu eta egikaritzea organo eskudunek agintzen dizkieten kargu, izendapen eta hautapenak, salbu eta organo horiek ontzat hartzen badituzte karguok onartzea eragozten duten arrazoiak.

9) Nahitaezko kuotak ordaintzea, salbu eta uri buru batzarrak ontzat hartzen baditu hori eragozten duten arrazoiak.

10) Euskara erabiltzea EAJ-PNVren barruan zein kanpoan, eta bera ikasten eta hitzez eta idatziz jakiten ahalegintzea.

11) Alderditik kanpo, kargu publiko baterako hautatua izateko aukera EAJ-PNVren buru batzar eskudunari jakinaraztea eta haren baimenik gabe ez onartzea.

12) EAJ-PNVren batzarretan edo beste organo batzuetan eztabaidatutakoa isilpean gordetzea.

13) Ez egitea Alderdiaren izen ona zikinduko duen ekintza edo adierazpen publikorik.

14. artikulua.— EAJ-PNVn, baja izan daiteke borondatezkoa, derrigorrezkoa edo lege-eskakizunen ondoriozkoa.

a) Borondatezkoa espresua edo isilekoa izan daiteke. Espresua da interesdunak berak askatasunez adierazten duenean. Isilekoa da:

— Nahitaezko kuotak ez ordaintzeagatik denean, behin uri buru batzarrak ordaintzeko egindako bigarren errekerimendua egin zuenetik hilabete igarota, salbu eta uri buru batzarrak uste badu badela arrazoirik ordainketa hori ez egiteko.

— Alderdikideren batek, buru batzar eskudunak aurretiaz baimenik eman gabe, EAJ-PNVren izenean aukeratua irten zen udal taldea, batzarkide taldea edo legebiltzar taldea uzten duen kasuan.

— Alderdikideren batek, herri-hautapeneko karguren batean dagoenean, EAJ-PNVz besteko hautagaitza aurkezten badu edo hori aurkezten laguntzen badu, buru batzar eskudunak aurretiaz baimenik eman gabe.

— Alderdikideren batek EAJ-PNVz besteko alderdi politiko batek izendatutako kargu publikoa, konfiantzazkoa edo izendapeneko hartzen badu, buru batzar eskudunak aurretiaz baimenik eman gabe.

b) Derrigorrezko baja organo judizial eskudunak erabakita bakarrik gerta daiteke, aldeztu aurretik diziplinazko espedienteari hasiera emanik, eta honako arrazoirien batengatik izanik:

1. Izen-ematea burutzeko unean bete behar diren datuak nahita faltsutzeagatik.

2. Ez betetzeagatik 5. artikuluan xedatutakoa.

3. EAJ-PNVren diziplinaren aurka doazen edo iritzi publikoaren aurrean haren irudiari kalte egin dioten adierazpen edo jarduketa publikoak egiteagatik.

4. Jendaurrean EAJ-PNVren proiektu politikoaren aurka adierazpenak egiteagatik.

5. EAJ-PNVren organoek baliozkotasunez hartutako erabakien aurka era antolatuan jarduteagatik, Alderdiaren barneko bideetatik kanpo eta kargu publiko batez edo Alderdiaren barneko kargu batez edota gizarte-komunikabideez baliatuta.

6. Norberari alderdikide gisa dagozkion betebeharrak ez betetzeagatik, hots, 13. artikulukoak, salbu eta artikuluko 5. eta 6. apartatuetakoa.

c) Lege-eskakizunek eragindako baja horrelakotzat hartuko du uri buru batzarrak beren-beregi erabakita; horretarako, bajak ukitutako alderdikideak eskabidea egin beharko du aurretik; hori horrela izango

da, alderdikide batek lanbide edo lanpostu bat eskuratu eta, arau juridikoren bat dela bide, ogibide horretan jarduteko derrigorrezkoa denean alderdi politikoetako kidea ez izatea.

d) EAJ-PNVko alderdikideen edo organoen ekintzen edo ez-egiteen ondoriozko diziplinazko arau-haustek, haren estatutuen eta erregelamenduen aurkakoak badira, organo judizialek oso astuntzat, astuntzat, ez hain astuntzat eta arintzat kalifikatuko dituzte, urratutako eginbeharraren izaera eta eragindako eskubidearen edo egindako kaltearen garrantzia kontuan hartuta.

Arau-hausteengatik ezin izango da diziplina zehapenik jaso, organo judizial eskudunak zentzu horretan emaniko ebazpenaren bidez ez bada, eta diziplina-prozeduraren arabera egin beharreko espedienteak ireki ondoren; EAJ-PNVren alderdikide batek edo horretarako eskubidea duen EAJ-PNVren barneko organo batek proposatu behar izan du espediente hori; edozelan ere, bestelako erantzukizunek indarrean iraungo dute, eta bermatu egingo da alderdikideak egitateen berri jasotzeko duen eskubidea, bai eta zehapenak ezarri baino lehen entzuna izateko duen eskubidea ere.

Arau-hauste berberagatik inola ere ezin izango da zehapen nagusi bat baino gehiago ezarri.

e) Salbuespenez, Euzkadi Buru Batzarrak EAJ-PNVren izen onari ageriko kaltea dakarkion delituagatik instrukzio fasean ikertua den alderdikidearen alderdikidetza kautelaz etetea erabaki ahal izango du, alderdikideari entzun ondoren. Alderdikidetza kautelaz etetea automatikoa izango da baldin eta ahozko epaiketa irekitzeko autoa ematen bada eta auziak ustelkeria kasuren batekin zerikusia baldin badu.

Era berean, kautelazko etetea automatikoa izango da baldin eta alderdikide bat genero-indarkeriako edo sexu-askatasunaren aurkako delitu batengatik ikertua bada, eta honako agiri hauetako baten bidez egiaztatu ahal bada:

— Indarrean dagoen babes-agindua, edo Fiskaltzaren txostena, zeinak adierazi behar baitu badagoela zantzurik eskatzailea genero-indarkeriaren biktima dela eta egilea alderdikidea dela, harik eta babes-agindua eman arte.

— Kautelazko neurri penalak erabaki dituen ebazpen judiziala, betiere neurri horiek indarrean badaude.

— Ebazpen judiziala, zeinak egiaztatzen baitu ezen alderdikideak genero-indarkeria egikaritu duela edo sexu-askatasunaren aurkako delitu bat egin duela.

Oro har, epai irmo baten bidez kondenatuak izan diren alderdikideei Alderditik kanporatzeko zehapena ezarri ahal izango zaie, Euzkadi Buru Batzarrak Justiziako Aberri Epaimahaiaren aurrean alderdikidea kanporatzeko hasiko duen espedientea dela bide.

Absoluzio-epaia ematen bada edo jarduketak artxibatzen badira, alderdikideari etetea kenduko zaio eta eskubide guztiak itzuliko zaizkio, eta hori behar bezala iragarriko da.

15. artikulua.— 13. artikuluko 5. eta 6. apartatuetan agertzen diren betebeharrak ez betetzeagatik, botoa emateko eskubidea, eta Alderdiaren barneko hautapeneko edozein kargutarako edo edozein kargu publikotarako hautatzeko eta hautatua izateko eskubidea bakarrik etengo dira, Diziplina Erregelamenduan ezarritako denborarako eta haren arabera. Hala eta guztiz ere, uri buru batzarrak kasu bakoitzaren inguruabarrak aztertuko ditu, aipaturiko betebeharron ez-betetzea banan-banan zurrizteko.

16. artikulua.— EAJ-PNVren buru batzarrek euren giza baliabideen plangintza egingo dute, eta alderdikideak prestatzeko eta sustatzeko politika garatuko dute.

17. artikulua.— EAJ-PNVren buru batzarrek bideak sortu eta indartuko dituzte, Alderdiaren alderdizaleekin komunikatzeko, eta haiekin harremanak izateko.

Horretarako, uri erakundeek EAJ-PNVren lokalen erabilera bultzatuko dute, batez ere, batzokiena; helburu horrekin, alderdikide ez direnek parte har dezaketen jarduerak antolatuko dira, eta alderdikide ez direnek parte hartuko duten talde edo elkarteen sorrera sustatuko dute.

II. TITULUA

e-ERAKUNDEA

18. artikulua.— EAJ-PNVko alderdikide egiteko eskabidea aurkeztu duenak, baldin eta herrialde erakunde baten edo Alderdiaren Euzkadiz kanpoko erakunde baten eremu geografikotik kanpo bizi bada, e-Erakundea erakunde birtualean sartzeko eskabidea egin ahal izango du; e-Erakunde hori Euzkadi Buru Batzarraren mende egongo da.

Era berean, edonork aurkeztu ahal izango du e-Erakundean sartzeko eskabidea, bera non bizi den kontuan hartu gabe, baldin eta oraindik EAJ-PNVko alderdikide izan nahi ez badu, baina Alderdiarekin lotura bat izan nahi badu komunikatzeko eta informatzeko alderdizale gisa.

e-Erakundean sartzeko, eskatzaileak egin beharreko eskabidea bete eta sinatu beharko du, eskabidean ezartzen diren konpromisoak bereganatu eta betekizunak bete beharko ditu, eta erakundean sartzeko eskabidearen aldeko ebazpena jaso beharko du, eskabidea erregistratzen denetik hilabeteko epean.

e-Erakundeko kide izatea ez da, inola ere, EAJ-PNVko alderdikide izatea, baina bai inplikatzeko du harreman-lotura bat elkartutako pertsonaren eta Alderdiaren artean, komunikazioa eta informazioa partekatzeko.

Euzkadi Buru Batzarrari dagokio e-Erakundeari dagokion guztia arautzea, bai eta horren berri ematea Aberri Batzarrari.

III. TITULUA

EAJ-PNVren ANTOLAKETA

I. kapitulua

PRINTZPIO OROKORRAK

19. artikulua.— EAJ-PNV alderdi bakarra da, eta ezaugarri hauek ditu:

a) Batzar-eraketa duen alderdia da, eta haren alderdikideen benetako partaidetza errazten du alderdi politiko gisa dagozkion erabakiak hartzean eta eginkizunen egikaritzan.

b) Uri eta herrialde mailetakako erakundeei dagozkien erabakiak hartzeko eskumenen eremua zaintzea bermatzen du une guztietan.

c) Botere eta eginkizunen banaketatik hasita egituratzen ditu Alderdiaren barneko organoak.

d) Bere buru batzarrak kide anitzeko organo gisa egituratzen ditu.

e) Bere egiten ditu printzipio hauek: Alderdiaren barneko karguak eta Alderditik kanpoko karguak banantzekoa; boterea ez metatzekoa, eta kontrolatzailea eta kontrolatua ez nahastekoa.

f) Onartzen du Alderdiaren barneko kargu bat edo kargu publiko bat hautatzeko organo eskudunek, era berean, ahalmena dutela hautapen hori edozein unetan ezeztatzeko.

20. artikulua.— Alderdiaren kide anitzeko organoak organo bakoitzeko presidentearen deialdiaren bidez batzartuko dira eta deialdia gutxienez ohiko edo ezohiko bilera egunerako ezarritako eguna baino 3 egun lehenago egin beharko da, betiere kasuak behar duen presarekin, baldin eta beren ekimenez erabakitzen badute edo organoetako kide guztien laurden batek eskatzen badu arrazoiak eta bileraren xedea adierazita.

Hori guztia gorabehera, organo bakoitzak bere erregelamenduan epe zehatz bat ezarri ahal du, eta epe hori aplikatuko da.

Deialdiak komunikazio idatzi baten bidez egingo dira, eta hauek adieraziko dira: bilerarako lekua, eguna eta ordua, eta gai-zerrenda, zeinak izango dituen aztertuko diren gaiak, eta esango da zein organok egiten duen deialdia.

Gutxienez kideen erdiek egon beharko dute bileran, presako kasuetan izan ezik. Kasu horietan presidenteak azalduko du zein arrazoi izan dituen bilera quorum txikiagoarekin egiteko, eta proposamena bozketara eramango du.

Gai-zerrendak presidenteak erabakitzen dituen gaiak jasoko ditu eta, horiekin batera, deialdia bidali baino lehenago, gutxienez kideen laurden batek planteatu d(it)uen puntua(k) ere bai.

Kide anitzeko organoan sortzen diren eztabaidak presidenteak gidatuko ditu. Gai-zerrendako gai bakoitza aurkeztu ondoren, hitz egiteko txanda bat zabalduko da eta presidenteak hitza emango die hala eskatu duten kideei, eta, beharrezko jotzen badu, ihardespentxanda eman ahal izango du.

Kide anitzeko organoen erabakiak bertaratuen gehiengo soilez hartuko dira, salbu eta estatutuek gehiengo kualifikatua eskatzen badute.

II. kapitulua

URIETAKO, HERRIALDEETAKO ETA ABERRIKO ERAKUNDEAK

Lehenengo atala:

Urietako erakundeak

21. artikulua.— 1. Uri erakunde bat eratzeke edo desegiteke eskumena herrialde buru batzarrari dagokio. Uri erakunde bat eratzeke beharrezkoa izango da berari dagokion herrialde estatutuak zehaztutako alderdikideen kopurua egotea udal-mugartean edo mugapean.

2. Udalerrietako eraketa geografikoa edo alderdikideen kopurua direla eta, uri erakunde bat behar beste erakundetan zatitu ahal izango da ondoko kasu hauetan:

a) Eratu behar den uri erakundearen mugartean edo mugapean helbideratuta dauden alderdikideen % 50ek baino gehiagok eskatzuz gero, eta herrialde buru batzar eskudunak baimena emanda, lehengo uri erakundeari entzun eta gero.

b) Herrialde buru batzarrak proposatu eta eratu behar den uri erakundearen mugartean edo mugapean helbideratuta dauden alderdikideen % 50en baino gehiagoren adostasunarekin, lehengo uri erakundeari entzun eta gero.

Uri erakunde bat zatitzen denetan, batzorde bat sortuko da; batzorde hori osatuko dute ekimenaren proposatzaileen ordezkariak, bereizketaren jatorriko erakundearen ordezkariak eta herrialde buru batzarraren ordezkariak; eta haren helburua izango da, besteak beste, lurralde-mugapea eta ondarea zehaztea, uri erakunde berria eratu baino lehen.

3. Uri erakunde bik edo gehiagok bat egin ahal izan dezaten, beharrezkoa izango da uri erakundeetatik bakoitzeko kideen % 50ek baino gehiagok hala erabakitzea, eta herrialde buru batzarraren baimen egokia jasotzea.

22. artikulua.— Uri erakunde bakoitzak bere uri estatutuen arabera egingo du barne-antolaketa, betiere estatutu hauetan eta hari dagokion herrialde erakundekoetan xedatutakoa kontuan harturik.

Buru Batzarren Artekoa

23. artikulua.— 1. Herrialde buru batzar eskudunak, uri erakundeen gehiengoak hala eskatzen badu, buru batzarren artekoa eratzea erabaki ahal izango du.

2. Buru batzarren artekoa gutxienez osatuko dute uri erakunde parte-hartzaile bakoitzaren uri buru batzarreko lehendakariak edo horiek izendatutako pertsonak eta herrialde buru batzar eskuduneko kide bik.

Uri buru batzarreko lehendakariak edo haren eskuordeak buru batzarren artekoaren inguruko zuribidea eskainiko du bere uri batzarrean.

3. Buru batzarren artekoa organo funtzionala da, eta ardura dauka EAJ-PNVren ekintza politikoa batu, bultzatu eta kontrolatzeko, betiere haren sorrera eragin zuten eginkizun eta xedeetarako, eta haren jarduketa-eremuaren barruan.

4. Herrialde buru batzarrek buru batzarren artekoa eratzeke hartuko duen erabakian funtzionamenduko barne-erregelamendua ezarriko da, zeinean, tartean dauden erakundeei entzun eta gero, agerraraziko baitira haren xedeak, eginkizun espezifikoak eta erabakiak hartzeko modua, bai eta haren jarduketa-eremua ere.

5. Uri buru batzarretako lehendakarien edo haien eskuordeen eta herrialde buru batzarren kideen arteko desadostasuna badago, orduan horietako edonork gaia herrialde batzarrera eraman ahal izango du, eta auzia bertan erabakiko da.

Bigarren atala:

Herrialdeetako erakundeak

24. artikulua.— EAJ-PNVren Arabako, Bizkaiko, Gipuzkoako, Iparraldeko eta Nafarroako herrialde erakundeak eurei dagozkien herrialdeetako uri erakundeek osatuko dituzte.

25. artikulua.— Herrialde erakunde bakoitzak herrialde estatutuen arabera atonduko du bere barne-antolaketa, betiere estatutu hauek xedatzen dutena zainduz.

Hirugarren atala:
Aberri-erakundea

26. artikulua.— EAJ-PNVren aberri-erakundeak bere alderdikide guztiak hartzen ditu, baita uri erakundeak eta herrialde erakundeak ere. Euzkadiz kanpoko erakundeek ere aberri-erakundea osatzen dute.

III. kapitulua
EUZKADIZ KANPOKO ERAKUNDEAK

27. artikulua.— Euzkadiko lurraldetik kanpo sortzen diren erakundeak, baita horietan sartzen diren alderdikideak ere, Euzkadi Buru Batzarraren orientazio orokorreari loturik egongo dira; izan ere, horrek eskuordetza bereziak zein iraunkorrak bidali ahal izango ditu, eta beharrezko deritzen beste jarduketara egitea erabaki dezake EAJ-PNVren ekintza politikoa garatzeko Euzkaditik kanpo.

28. artikulua.— Euzkadiz kanpoko erakundeek lurralde nazionalen dauden uri erakundeek bezala funtzionatuko dute, eskubide eta eginbehar berberekin, Aberri Estatutuetan xedatutakoaren kalterik gabe, eta bakoitzak bere estatutuen arabera antolatuko du bere burua barne-mailan. Haien eremuak edo jurisdikzioak eurak kokatuta dauden herrialdearen mugak hartuko ditu, 31. artikuluan xedatutakoaren kontra jo gabe.

29. artikulua.— EAJ-PNVren aberri-mailako organo zuzendarien jurisdikzioa alderdikide guztiengana hedatzen da, haien lurralde-egoera edozein dela ere, baita euren ohiko bizilekua euskal lurraldetik kanpo dutenengana ere.

30. artikulua.— 1. Euzkadiz kanpoko erakunde bakoitza Aberri Batzarrean egongo da bere ordezkarien bitartez, botoa emateko eskubidea duela, Aberri Batzarrak berak ohiko bilkuran eta urte osorako hala erabakitzen duenean, eta honako baldintza hauek egiaztatu ondoren:

- a) gutxieneko ekintza politiko eta iraunkorra garatzea;

b) bere barne-organoak eratuak edukitzea: batzarra, buru batzarra eta epaimahaia;

c) gutxienez 25 alderdikide izatea;

d) bere kuoten kobrantza normaltasunez kudeatzea.

2. Euzkadiz kanpoko erakundearen ordezkari bati, bertako alderdikidea izanik, Aberri Batzarrera azaltzea ezinezkoa zaionean, azken horrek lurralde nazionaleko uri erakunde bateko edo Euzkadiz kanpoko erakunde bateko alderdikide bati eskuordetu diezaioke bere ordezkaritza.

3. Era berean, Aberri Batzarrak erabaki ahal izango du aurreko baldintzak betetzen ez dituzten Euzkadiz kanpoko erakundeak ere bilkuretara azaltzea, hitz egiteko eskubidea bakarrik dutelarik.

31. artikulua.— Alderdikideen kopuruagatik hala behar duten herrialdeetan, Aberri Batzarrak egoki deritzen beste Euzkadiz kanpoko Erakunde eratu ahal izango du, betiere interesdunek hala eskatuz gero, eta haien batzarraren erabakia kontuan hartu ondoren.

32. artikulua.— Euzkadiz kanpoko erakundeek eta haien alderdikideek haien jarduketa-eremuan dauden euskal elkarte, etxe eta klubetan modu aktiboan parte hartuko dute, eta EAJ-PNVren ekintza politikoan lagunduko dute.

IV. kapitulua EUZKO GAZTEDI

33. artikulua.— 1. Euzko Gaztedi (EGI) EAJ-PNVren gazte-erakundea da.

2. EGIk parte hartuko du EAJ-PNVk gazteriarentzat egiten duen politikaren diseinugintzan, eta buru batzar eskudunek horretarako beharrezko jotzen dituzten bideak egokituko dituzte.

3. EGIk antolaketakarako autonomia izango du, bere estatutu eta erregelamenduen arabera, betiere EAJ-PNVren antolaketa-irizpideak betez.

4. EGIn txosten, ebazpen eta jarduketek bat etorri behar dute EAJ-PNVren ideologiarekin eta politika orokorrarekin.

IV. TITULUA BATZARRAK

I. kapitulua URIETAKO BATZARRAK

34. artikulua.— Uri batzarra da uri erakundearen organo nagusia. Uri batzarra uri erakundeko alderdikideek osatzen dute, haiek bildurik daudela estatutueta eta erregelamenduetan ezarritako betekizunen arabera.

35. artikulua.— Uri batzarrari honako hauek dagozkio:

a) Bere udal-mugartean EAJ-PNVren politika zuzentzea, betiere goragoko organoek hartutako erabaki eta gidalerroak errespetatuz.

b) Uri estatutuak onetsiz, EAJ-PNVren maila honetako antolaketa eta funtzionamendu-araubidea finkatzea.

c) Uri buru batzarra eta uriko organo judiziala aukeratzea.

d) Berari dagokion herrialde batzarrerako ahalduak eta Batzar Nagusirako ordezkariak aukeratzea, hartutako erabakiak haiek betetzen dituztela kontrolatu eta horiei, behar izanez gero, erantzukizuna eskatzea.

e) Herrialde batzarrean eta Batzar Nagusian, uri erakundearen izenean aurkez litezkeen proposamenak onestea.

f) Alkategaiak eta zinegotzigaiak aukeratzea, 86. artikuluan eta ondorengoetan ezarritakoaren arabera.

g) Uri buru batzarraren jarduketa politikoa orientatu, eta haren bidez buru batzarren artekoaren kideak, buru batzarren arteko hori badago, haren kudeaketa eta hartutako erabakiak bete daitezen kontrolatu, eta, behar izanez gero, haien karguaren egikaritzagatik erantzukizuna eskatzea.

h) Udal-eremuk kargu publikoen jarduketa politikoa orientatu, eta, behar izanez gero, erantzukizun politikoa eskatzea.

i) Alderdiaren barneko uri-karguek eta udalerriko kargu publikoetan diharduten alderdikideek aurkeztutako urteko txostena aztertzea, bera onesteko edo, bestela, ezesteko.

j) Hautagaiak proposatzea Alderdiaren barneko herrialde- edota aberri-eremuk karguetarako, eta herrialdeko, aberriko eta Euzkadiz kanpoko kargu publikoetarako, estatutu hauetan ezarritakoaren arabera.

k) Uri buru batzarrak proposatuta, ohiko uri batzarrean onestea itxitako ekitaldi ekonomikoko urteko kontuak eta hurrengo ekitaldi ekonomikorako aurrekontua, ekitaldiko lehenengo bi hilabeteen barruan, eta betiere ohiko herrialde batzar eskuduna egin baino lehen.

l) Urtero ohiko uri batzarrean kontu-aztertzaileak aukeratzea, 3 gehienez; ahal dela, kontu-aztertzaileok uri erakundeko alderdikideen artetik aukeratuko dira. Kontu-aztertzaile horiek ekitaldiko lehenengo bihilabetekoan aukeratu ezik, kontu-aztertzaile horiek herrialde batzarrak aukeratuko ditu.

36. artikulua.— Uri batzarraren erregelamenduak, edo, hori izan ezean, uri erakundearen estatutuek, antolaketa eta barne-funtzionamenduaren aspektu guztiak arautuko dituzte, betiere, goragoko estatutuetan eta erregelamenduetan xedatutakoa betez.

II. kapitulua HERRIALDEETAKO BATZARRAK

37. artikulua.— 1. Herrialde batzarra da herrialde erakundearen organo nagusia, eta ondoko hauek dira batzarreko kideak:

a) Uri batzarretan aukeratutako ahaldunak, zeinak aukeratuak baitira ordezkaritza proportzional arindu eta mugatuko sistema baten arabera.

b) Herrialde buru batzarra eta herrialde epaimahaia.

c) Herrialde erakundeetako alderdikideak diren Euzkadi Buru Batzarreko eta Aberri Epaimahaiko kideak.

d) Aberri Berme eta Zaingo Batzordea.

e) Aberri Batzarrean herrialde erakundeak dituen ordezkariak.

f) Herrialdeko instituzioetan herri-hautapeneko kargu publikoak dituzten alderdikideak eta, aurretiaz deituak izan baldin badira, instituzioetan izendapenekoak diren karguak.

g) Udalerrietako kargu publikoen ordezkaritza bat, edo beste alderdikide batzuk, herrialde batzarraren erregelamenduak xedatutakoaren arabera.

h) Euzko Gaztediren herrialde buru batzarraren ordezkariak.

i) Herrialde idazkaritzako arduradun teknikoak, horiek badaude.

2. Hitz egiteko eta botoa emateko eskubidea izango dute a) apartatuko kideek. Herrialde batzarreko gainerako kideek hitz egiteko eskubidea izango dute soilik.

38. artikulua.— Herrialde batzarrari honako hauek dagozkio:

- a) Bere herrialdean EAJ-PNVren politika zuzentzea.
- b) Uri erakunde biri edo gehiagori dagokien guztia.
- c) Herrialde estatutuak onetsiz, herrialde erakundearen antolaketa eta funtzionamendu-araubidea finkatzea.
- d) Herrialde buru batzarreko kideak eta haren burua, justiziako herrialde epaimahaiko kideak, baita Aberri Batzarreko ordezkariak ere aukeratzea.
- e) Bere herrialdeko ganbera legegilerako hautagaiak aukeratzea, bai eta ganbera horretako eta organo betearazle eskuduneko lehendakariako hautagaiak ere, herrialde buru batzarrak proposamena egin eta gero.
- f) Herrialde erakundearen proposamena egitea batzar bakoitzak ondoko hautagaiak aukera ditzan: Euzkadi Buru Batzarreko kideak eta lehendakaria, Justiziako Aberri Epaimahaiko kideak, eta Aberri Berme eta Zaingo Batzordeko kideak, eta aberriko eta Euzkadiz kanpoko kargu publikoak.
- g) Herrialde buru batzarraren jarduketa politikoa orientatu, haren kudeaketa eta hartutako erabakiak bete daitezen kontrolatu, eta, behar izanez gero, haren karguaren egikaritzagatik erantzukizuna eskatzea.
- h) Hartutako erabakiak bete daitezen kontrolatu eta, behar izanez gero, Aberri Batzarrean berak dituen ordezkariari erantzukizuna eskatzea.
- i) Herrialde-eremuko kargu publikoen jarduketa politikoa orientatu eta, behar izanez gero, erantzukizun politikoa eskatzea.
- j) EAJ-PNVren herrialdeko organoek eta herrialdeko kargu publikoetan diharduten alderdikideek aurkeztutako urteko txostena aztertzea, bera onesteko edo, bestela, ezesteko.
- k) Herrialde buru batzarrak proposatuta, udalerriaren maila gainditzen duten plan, proiektu edota ekimenak herrialdearentzat interes estrategikokoak direlako adierazpena onestea.
- l) Herrialde batzarraren izenean, Aberri Batzarrean eta Batzar Nagusian aurkez litezkeen proposamenak onestea.
- m) Uri erakunde baten edo gehiagoren eta herrialde buru batzarraren artean sor daitezkeen iritzi-ezberdintasunak ebaztea.
- n) Buru batzarren artekoan sor daitezkeen gatazkak ebaztea, estatutu hauen 86. artikuluan xedatutakoa betez.

ñ) Herrialde buru batzarrak proposatuta, ohiko batzarrean onestea itxitaldi ekitaldi ekonomikoko herrialde mailako urteko kontu kontsolidatuak eta hurrengo ekitaldirako aurrekontua, betiere ekitaldiko lehenengo bi hilabeteen barruan, eta Euzkadi Buru Batzarrari bidaltzea.

o) Bi urtean behin bi kontu-aztertzaile eta bi ordezkio aukeratzea, zeinek informatuko baitute herrialde buru batzar eskudunak aurkeztutako kontuen egokitasunaz eta barne-kontroleko sistemaz. Txosten hori, urteko kontuekin batera, herrialde buru batzarrak proposatuta, onesteko aurkeztuko da.

Era berean, ohiko uri batzarrean kontu-aztertzaileak aukeratu ez duten uri erakundeetako kontu-aztertzaileak aukeratzea.

39. artikulua.— Herrialde Batzarraren Erregelamenduak haren antolaketa eta barne-funtzionamenduaren aspektu guztiak arautuko ditu, betiere goragoko estatutuetan eta erregelamenduetan xedatutakoa errespetatuz.

Edozein kasutan, ohiko herrialde batzarra Ohiko Aberri Batzarra egin baino lehen egin beharko da.

III. kapitulua ABERRI BATZARRA

40. artikulua.— 1. Aberri Batzarra da aberri erakundearen organo nagusia, eta ondoko hauek dira batzarreko kideak:

a) Herrialde erakundeetako eta Euzkadiz kanpoko erakundeetako ordezkariak, ondoko irizpide hauen arabera:

— 15 ordezkari Arabako, Bizkaiko, Gipuzkoako eta Nafarroako herrialde erakundeetatik bakoitzeko, zenbat alderdikide dituen kontuan hartu gabe;

— 5 ordezkari Iparraldeko herrialde erakundetik;

— 30 ordezkari, herrialde erakundeen artean banaturik, alderdikideen kopuruaren heinean. Sistema hau lau urtetik behin berrikusiko da;

— Euzkadiz kanpoko erakundeek, behar den moduan eratuak izan eta, estatutuok zehaztutako baldintzen arabera, EAJ-PNVren erakunde gisa gutxieneko jardura burutzen badute, boto bat izango dute erakunde bakoitzeko, baina ezin izango dute guztiek batera 5 bototik gora izan Aberri Batzarrean.

b) Euzkadi Buru Batzarra.

c) Herrialde buru batzarrak.

d) Justiziako Aberri Epaimahaia, eta Aberri Berme eta Zaingo Batzordea.

e) Eusko Jaurlaritzako Lehendakaria eta sailburuak, eta aberriko eta Euzkadiz kanpoko erakundeetan herri-hautapenekoak diren kargu publiko EAJ-PNVren alderdikideak.

f) Udal eta herrialde eremuetako kargu publikoen ordezkaritza bat, Aberri Batzarraren Erregelamenduak xedatutakoaren arabera.

g) Euzko Gaztediren Aberri Kontseilua.

h) Euzkadi Buru Batzarrak edo Aberri Batzarrak deitutako alderdikideak, bai norbera legez, bai alderdikide batzuen taldeen ordezkari legez.

2. Hitz egiteko eta botoa emateko eskubidea izango dute 1.a) apartatuan aipatutako kideek. Aberri Batzarreko gainerako kideek hitz egiteko eskubidea izango dute soilik.

3. Herrialde erakunde bakoitzak ordezeko legez izango du, gehienez, 1.a) apartatuan aipatutako ordezkarien herena. Euzkadiz kanpoko erakundeetatik bakoitzak ordezeko bat izendatu ahal izango du.

41. artikulua.— Aberri Batzarraren Mahaia urtebeteko aldirako aukeratuko da, beraren izendapena ezeztatu daitekeelarik, eta batzarraren erregelamenduak eratzikitzen dizkion politikaz besteko eginkizunak egikaritzeko ditu.

42. artikulua.— 1. Aberri Batzarrari honako hauek dagozkio:

a) EAJ-PNVren zuzendaritza politiko orokorra.

b) Herrialde biri edo gehiagori dagokien guztia.

c) Aberri Estatutuen erreforma onestea; hala eginez gero, Batzar Nagusiak berronetsi beharko du erreforma hori.

d) Batzar Nagusiaren Erregelamenduaren, Aberri Berme eta Zaingo Batzordearen Erregelamenduaren, Diziiplina Erregelamenduaren, eta Hauteskundeei buruzko Erregelamenduaren erreforma onestea.

e) Euzkadi Buru Batzarrak proposatuta, itxitako ekitaldi ekonomikoko aberri mailako urteko kontu kontsolidatuak eta aberri erakundearen aurrekontua onestea, ekitaldiko lehenengo hiru hilabeteen barruan.

f) Justiziako Aberri Epaimahaia, eta Aberri Berme eta Zaingo Batzordea aukeratzea.

g) Euzkadi Buru Batzarrak proposatuta, aberriko edota Euzkadiz kanpoko kargu publikoetarako hautagaiak aukeratzea: Eusko Legebiltzarrerako hautagaiak, Eusko Legebiltzarreko lehendakaria eta Eusko Jaurilaritzako Lehendakaria, espainiar estatuko Gorte Nagusietarako eta frantziar estatuko Parlamenturako hautagaiak, eta Europar Parlamenturako hautagaiak.

h) Euzkadi Buru Batzarraren jarduketa politikoa orientatu, beraren kudeaketa eta hartutako erabakiak bete daitezen kontrolatu, eta, behar izanez gero, haren karguaren egikaritzagatik erantzukizuna eskatzea.

i) Aberriko edota Euzkadiz kanpoko kargu publikoak egikaritzen dituzten alderdikide guztien ekintza politikoa orientatu, eta, behar izanez gero, erantzukizun politikoa eskatzea.

j) Euzkadi Buru Batzarrak proposatuta, herrialdearen maila gainditzen duten plan, proiektu edota ekimenak interes estrategikokoak direlako adierazpena onestea.

k) Herrialde erakundearen artean, edo horien eta Euzkadi Buru Batzarraren artean sor daitezkeen iritzi-ezberdintasunak ebaztea.

l) Estatutu hauetan ezarri ez diren aberriko edota Euzkadiz kanpoko arazoak ebaztea.

m) Aberriko edota Euzkadiz kanpoko instituzioei eragiten dieten koalizioak, itunak, legegintzaldietarako akordioak eta gainerako akordio egonkorak onestea.

n) Euzkadi Buru Batzarrak eta herrialdeetako edozein buru batzarrek edota batzarrek egiten dituzten proposamenak jakin eta, hala badagokio, onestea.

ñ) Lau urtean behin Kontu-Aztertzaileen Aberri Batzordea aukeratzea; erakunde bakoitzeko ordezkari bana aukeratuko da batzorde hori osatzeko; kide horiek, berriz, herrialde erakundeetako bakoitzaren ordezkarien artean aukeratuko dira.

Batzordea ohiko bileran batzartuko da gutxienez hiruhileko natural bakoitza amaitutakoan eta aurkeztu diren kontuen egokitasunaz eta erakundean barneko kontrolerako ezarritako sistemaz informatuko du.

Txostena nahitaezkoa izango da eta Euzkadi Buru Batzarraren proposamenez onesteko aurkeztuko diren urteko kontuekin batera aurkeztuko da.

2. Era berean, Aberri Batzarreko ordezkariak hautatuko dituzte Euzkadi Buru Batzarreko lehendakaria eta Euzkadi Buru Batzarreko zortzi burukide Batzar Nagusiaren baitan, betiere erregelamenduz ezarritako prozedura betez.

Edonolako kausa dela eta, Batzar Nagusiaren baitan aukeratutako Euzkadi Buru Batzarreko lehendakariak edo 8 burukideetako edozeinek kargua uzten badu, lehendakari berria edo burukide berria Aberri Batzarrak aukeratuko du, eta bere karguan iraungo du hurrengo Batzar Nagusia egin arte.

43. artikulua.— 1. Aberri Batzarra ohiko bilkuran urtean behin batzartuko da nahitaez, ekitaldiko lehenengo hiru hilabeteen barruan, honako helburu hauekin:

a) EAJ-PNVren aberri-organoek eta, 42.1 artikuluko g) apartatuari dagokionez, kargu publikoetan diharduten alderdikideek aurkeztutako urteko txostena aztertzea, bera onesteko edo, bestela, ezesteko.

b) EAJ-PNVren estrategia politikoa ezartzea, urtebeteko hurrengo aldirako.

c) Aurrekontua eta aberri mailako urteko kontu kontsolidatuak onestea, zeinak aurkeztu behar baitira Kontu-aztertzaileen Aberri Batzordeak aurretiaz emandako nahitaezko txostenarekin.

d) Herrialdeetako edozein buru batzarrek edota batzarrek egiten dituzten proposamenak jakitea.

2. Aberri Batzarrak lau urtetik behin hautatuko ditu Alderdiaren barneko aberri eremuko karguak; Euzkadi Buru Batzarra eta Aberri Batzarra berriztatu eta handik bi urtera aukeratu beharko dira Justiziako Aberri Epaimahaiko kideak, eta Aberri Berme eta Zaingo Batzordeko kideak.

44. artikulua.— 1. Aberri Batzarra ezohiko bilkuran batzartuko da, urteko edozein egunetan, deialdia egiten bada:

a) Aberri Batzarrak berak erabakita.

b) Euzkadi Buru Batzarraren ekimenez.

c) Bi herrialde buru batzarrek proposatuta.

d) 15 ordezkari edo herrialde erakunde bateko ordezkari guztiek eskatuta.

e) EAJ-PNVren uri erakundeen edo alderdikideen % 15ek sinatutako eskaera batez.

2. Aberri Batzarra egingo da, deialdi-eskaera Batzarraren Mahaiari aurkezten zaion egunaren ondorengo 30 egun naturalen barruan.

3. Aldi horren lehenengo hamabost egunen barruan egiten ez bada deialdia, eskatzaileek errekurtsa jar diezaiokete Justiziako Aberri Epaimahaiari, zeinak batzarrerako deialdia egingo baitu errekurtsa aurkezten den egunetik zenbatu beharreko hogeit hamar eguneko aldiaren barruan egiteko batzarra.

45. artikulua.— 1. Batzarrak, ohikoak nahiz ezohikoak, Aberri Batzarraren Mahaiak deituko ditu, gutxienez 15 egun natural lehenago.

2. Hala eta guztiz ere, Aberri Batzarraren Mahaiak edo Euzkadi Buru Batzarrak uste badute presa eta larritasun bereziko egoera dagoela, Ezohiko Aberri Batzarrerako deialdia egingo da, adierazitako epeei kasurik egin gabe. Presako egoera hori batzarrak berronetsi beharko du.

3. Ohiko Aberri Batzarra deitzen ez bada, bera martxoaren azkeneko igandean batzartuko da beste barik, aurreko Aberri Batzarra egin zen leku eta ordu beretan.

46. artikulua.— 1. Aberri Batzarrak bertan dauden kideen gehiengo soilaren bitartez hartuko ditu erabakiak.

2. Hala eta guztiz ere, bozkatzeko eskubidea izan eta batzarrean dauden ordezkariak emandako botoen gehiengo osoa behar izango da ondoko hauetarako:

a) Alderdiaren barneko karguak, eta kargu publikoetarako hautagaiak aukeratzeko;

b) Estatutu hauetako 43.1 a) eta c) artikulua aipatzen dituen urteko txostenak onesteko;

c) EAJ-PNVren Aberri Estatutuak onetsi eta erreformatzeko;

d) Aberriko edota Euzkadiz kanpoko instituzioei eragiten dieten koalizioak, itunak, legegintzaldietarako akordioak eta gainerako akordio egonkorak onesteko.

47. artikulua.— 1. Aberri Batzarrari dagokio bere erregelamendua onestea, zeinak haren barne-antolaketa eta funtzionamendua araubidea zehaztuko dituen.

2. Aberri Batzarrak hartutako erabakien aktak herrialde buru batzarretara bidaliko dira hiru egun balioduneko epean, horiek, era berean, uri erakundeetara berehala igor ditzaten, baita ere Euzkadiz kanpoko erakundeetara eta EGlnen Aberri Kontseilura.

48. artikulua.— Herrialde erakundeek mekanismo egokiak jarriko dituzte, herrialde buru batzarrek eta Aberri Batzarreko ordezkariak alderdikideei ahalik eta arinen eman diezaieten Aberri Batzarrean aztertutakoaren berri. Euzkadiz kanpoko erakundeek antzeko mekanismoak ezarriko dituzte.

IV. kapitulua BATZAR NAGUSIA

49. artikulua.— Batzar Nagusia ohiko deialdiaz lau urtetik behin eratzen da; horren aurretik EAJ-PNVn eztabaida egingo da, honako helburu hauekin:

a) EAJ-PNVk aldi horretan izan duen jarduketa politikoaren balantzea egitea.

b) Haren proiektu politikoa birbaieztatzea edo eraberritzea, ebazpenak edota dokumentu ideologiko eta programatikoak behin eta betiko onetsiz.

c) EAJ-PNVren barne-antolaketa aztertu eta, hala behar izanez gero, estatutuak aldarazteko Aberri Batzarrak aurretiaz onetsitako erabakia gehiengo osoaren bidez berroneste.

d) EAJ-PNVren alderdikideek edota organoek, estatutuetako eta erregelamenduetako bidez, aurkeztutako ebazpen-proposamenak eztabaidatu eta, egokia bada, oneste.

e) Euzkadi Buru Batzarreko lehendakaria eta Euzkadi Buru Batzarreko zortzi burukide aukeratzea, 42.2 artikuluaaren arabera.

50. artikulua.— Batzar Nagusiaren kideak honako hauek izango dira:

a) Batzar Nagusirako beren-beregi hautaturiko uri erakundeen ordezkariak; horiek EAJ-PNV osorako sistema bakar batez aukeratuko dira, hau da, ordezkaritza proportzional arindu eta mugatuaz:

- 100 alderdikideraino.....ordezkari 1
- 101 alderdikidetik 350era 2 ordezkari
- 351 alderdikidetik 700era 3 ordezkari
- 701 alderdikidetik 1.150era 4 ordezkari
- 1.150 alderdikidetik gora 5 ordezkari

b) Euzkadiz kanpoko erakundeen ordezkariak, a) puntuan adierazitako baldintzen eta sistemaren arabera aukeratuta.

c) Aberri Batzarreko ordezkariak.

d) Aberri Batzarra osatzen duten gainerako kideak.

e) Herrialde eta udal mailetakoko kargu publikoak egikaritzen dituzten alderdikideen ordezkari bat, Batzar Nagusiaren Erregelamenduak xedatutakoaren arabera.

f) Euzko Gaztediren ordezkariak.

g) Euzkadi Buru Batzarrak gonbidatutakoak, bai norbera lege, bai talde baten ordezkari gisa.

Batzar Nagusian hitz egiteko eta botoa emateko eskubidea izango dute a), b) eta c) apartatuetan aipatzen direnek bakarrik. Gainerako kideek hitz egiteko eskubidea izango dute soilik.

51. artikulua.— Aberri Batzarrak edo Euzkadi Buru Batzarrak egingo du deialdia Batzar Nagusirako. Aberri Batzarrak onetsiko du Batzar Nagusiaren Erregelamendua, eta, beste gai batzuen artean, ezarriko ditu haren kide horiek hautatzeko sistema, bai eta haren funtzionamendu-araubidea ere.

V. TITULUA

ALDERDIKIDEEI IRITZIA ESKATZEA

52. artikulua.— Uri erakundeek nahitaez deitu eta egin beharko dituzte uri batzarrak, estatutuen arabera Batzar Nagusiaren gaitzerrendako proposamenak eztabaidatzeko eta, hala behar izanez gero, onesteko.

53. artikulua.— 1. Aberri Batzarrean erabakiak hartzeko, alderdikideei iritzia eskatu beharko zaie, nahitaez:

a) Alderdiaren barneko karguak eta kargu publikoetarako hautagaiak aukeratzean, estatutu hauetan eta estatutuok garatuko dituzten hauteskundeei buruzko erregelamenduek ezarritako prozeduraren arabera;

b) Aberri Estatutuak aldaraztean;

c) Batzar Nagusiaren Erregelamendua, Diziplina Erregelamendua, Aberri Berme eta Zaingo Batzordearen Erregelamendua, eta Hauteskundeei buruzko Erregelamendua aldaraztean;

d) Euzkadi Buru Batzarreko kideentzat bateraezintasunak kentzea planteatzen denean;

e) Aberri Batzarra osatzen duten kideen herenak edo Euzkadi Buru Batzarrak hala erabakitzen duenean;

f) Herrialde erakunde bik edo uri erakundeen % 15ek hala eskatzen dutenean.

2. Uri erakundeek herrialde batzarrean dituzten ahaldunek eta herrialde erakundeek Aberri Batzarrean dituzten ordezkariak ezin izango dute botorik eman herrialde batzarretan eta Aberri Batzarrean, hurrenez hurren, aurretiaz ez bada urietako eta herrialdeetako batzar eskudunetan eskuartearen darabilten gaiaz erabakirik hartu.

54. artikulua.— 53. artikuluan aipatu dira alderdikideei iritzia eskatzeko prozesuak; bada, artikuluko horren a) eta d) apartatuetan aipatutako prozesu horietan aginduzko manamendua dagoela ulertuko da. Horri dagokionez, aginduzko manamendutzat joko da batzar eskudunetan lehenengo bozketan agertzen den borondatea bere horretan ematea. Hala eta guztiz ere, batzar eskudunek beren-beregi eman diezaiekete baimena euren ordezkariari, osotasunean edo zati batean, bestelako iritzia defendatzeko hautaketak ematen dituen aukeren esparruaren barruan.

55. artikulua.— Erabakiak hartzerakoan, 53. artikuluko b), c), e) eta f) apartatuek aipatzen dituzten gaitan, urietako eta herrialdeetako batzarren erabakiek ahalduak eta ordezkariak derrigortuko dituzte, izaera loteslearekin, euren jasotako iritzietatik hurbilen dauden alde egiteko, eztabaidak ematen dituen aukeren esparruaren barruan.

56. artikulua.— 53. artikuluko kasuetatik at, uri erakundeen eta herrialde erakundeen ordezkariak hartu ahal izango dute eurek egokiesten duten jarrera, eta batzar eskudunetan zuri bide egokia egin beharko dute; betiere, haien kargutik kendu ahal izango dira.

VI. TITULUA

BURU BATZARRAK

I. kapitula

URI BURU BATZARRAK

57. artikulua.— Uri buru batzarrak dira EAJ-PNVren uri erakunde bakoitzaren organo betearazleak.

58. artikulua.— Uri estatutuek zehaztu edo, horiek izan ezean, uri batzarrak erabakitzen duen beste kidek osatuko dituzte uri buru batzarrak; betiere, ezin izango dira inoiz hiru baino gutxiago izan, hots, lehendakari, idazkari eta diruzain gisa jardungo dutenak.

59. artikulua.— Uri batzarrek bi urtetik behin ohiko bilkuran hautatuko dituzte uri buru batzarretako burukideak urtearen lehenengo bi hilabeteen barruan, betiere ohiko herrialde batzarra egin baino lehen, aberri estatutu hauen IX. tituluaren xedatutakoaren arabera.

60. artikulua.— Uri buru batzarrari honako hauek dagozkie:

a) Uri batzarraren erabakiak betearaztea, eta, eskuordetzez, herrialde buru batzarraren erabakiak ere.

b) Uri batzarra batzartuta ez dagoenean, uri erakunde bakoitzaren eremuan EAJ-PNVren zuzendaritza politikoa egikaritzea, bere batzarrari guztiaren berri emanez eta herrialde buru batzarrak edota Euzkadi Buru Batzarrak euren eskumenen eremuan hartzen dituzten erabakiak errespetatuz.

c) Uri batzarrari urteko jarduketa-programa aurkeztea.

d) Gobernu-akordioak eta izaera egonkorreko itunak onestea edota horrelako akordioak hausteko erabakiak hartzea, beren-beregi bere eremuko uri erakundeei dagokienez eta betiere herrialde buru batzarrari aldez aurretik esanda eta azken honek hori bere eskumeneko legez galdatzen ez badu. Horren guztiaren berri al bait arinen emango dio uri batzarrari.

e) Gidalerro politikoak finkatzea, eta udalerrietako kargu publikoak orientatu, lagundu eta kontrolatzea, baita izendapeneko karguak ere, haien izendapenean, zuzenean edo zeharka, parte hartzen izan dutenean. Eginkizun horiek buru batzarren artekoetan dituen ordezkarien bitartez beteko ditu, buru batzarren artekoak dauden udalerrietan.

f) Ohiko zein ezohiko uri batzarretarako deialdia egitea.

g) Uri buru batzarrak proposatuta, ohiko uri batzarrari hauek aurkeztea, uri batzarrak onets ditzan: itxitako aurreko ekitaldi ekonomikoko urteko kontuak eta hurrengo ekitaldi ekonomikorako aurrekontua; horiek ekitaldiko lehenengo bi hilabeteen barruan aurkeztuko ditu, betiere ohiko herrialde batzarra egin baino lehen. Gainera, urteko kontuak herrialde buru batzarrari bidaliko dizkio kontu-aztertzaileen txostenarekin batera, kontuak kontsolidatzeko.

h) Uri estatutuetan beren-beregi eratxikitzen zaion beste edozein eginkizun, betiere, Aberri Estatutuetan eta herrialdekoetan ezarritakoaren kalterik gabe.

II. kapitulua HERRIALDE BURU BATZARRAK

61. artikulua.— Herrialde buru batzarrak herrialde erakundearen organo betearazleak dira.

62. artikulua.— Herrialde buru batzarrak gehienez 15 kidek osatuko dituzte, kopurua inola ere 10etik behera ezin dela jaitsi; kide horiek hautatuko dira batzar bakoitzak erabakitzen dituen antolaketa-arauen eta erregelamenduen arabera.

63. artikulua.— Herrialde buru batzarrari honako hauek dagozkio:

a) Bere herrialde batzarraren erabakiak betearaztea, eta, eskuordetzeaz, Euzkadi Buru Batzarrarenak.

b) Herrialde batzarra batzartuta ez dagoenean, bere herrialdean EAJ-PNVren zuzendaritza politikoa egikaritzea, bere herrialde batzarrari guztiaren berri emanez eta Euzkadi Buru Batzarrak bere eskumenen eremuan hartutako erabakiak errespetatuz.

c) Agintaldiak iraungo duen aldirako herrialde buru batzarraren jarduketa-programa herrialde batzarrari aurkeztea, bai eta urteroko jarduketa-planak ere.

d) Gobernu-akordioak eta izaera egonkorreko itun politikoak onestea, honako hauetan eragina dutenean:

— bere eremuko herrialde instituzioetan, lehenago haiei buruzko informazioa Euzkadi Buru Batzarrean emanez, eta betiere azken honek horiek bere eskumeneko legez galdatzen ez baditu;

— Herrialde erakunde bakoitzeko udal-instituzio bitan edo gehiagotan;

eta horien berri al bait arinen emango dio herrialde batzarrari.

e) Herrialdearentzat interes estrategikokoak direlako adierazpena proposatzea, udalerriaren maila gainditzen duten plan, proiektu edota ekimenetarako, interes estrategiko nazionaleko plan, proiektu eta ekimenetarako ezarritakoaren kalterik gabe.

f) Gidalerro politikoak finkatzea, eta bere eremuan jarduten duten herrialdeko kargu publikoak orientatu, lagundu eta kontrolatzea, baita izendapeneko karguak ere, haien izendapenean, zuzenean edo zeharka, parte hartzen izan dutenean.

g) Gidalerro politikoak finkatzea, eta udalerrietako kargu publikoak orientatu, lagundu eta kontrolatzea euren karguagatik udalez gaindiko eremuan jarduten dutenean.

h) Uri erakundeen artean azal daitezken desadostasunak ebaztea.

i) Ohiko herrialde batzarrari hauek aurkeztea, herrialde batzarrak onets ditzan: itxitako ekitaldi ekonomikoko herrialde mailako urteko kontu kontsolidatuak eta hurrengo ekitaldirako aurrekontua; horiek ekitaldiko lehenengo bi hilabeteen barruan aurkeztuko ditu. Gainera, urteko kontuak Aberri Buru Batzarrari bidaliko dizkio kontu-aztertzaileen txostenarekin batera, kontuak kontsolidatzeko.

j) Aberri Batzarrari proposamenak aurkeztea.

III. kapitulua EUKADI BURU BATZARRA

64. artikulua.— EUZKADI BURU BATZARRA aberri mailako organo betearazlea da eta, Aberri Batzarrak eskuordetuta, aginte gorena du. Bere eskumenen eremuan hartutako erabakiak derrigor bete behar dituzte EAJ-PNVren alderdikideek eta gainerako organoek.

65. artikulua.— 1. Euzkadi Buru Batzarreko kideak honako hauek dira:

a) Euzkadi Buru Batzarreko lehendakaria, euskalduna izan behar duena;

b) herrialde buru batzarretako lehendakariak;

c) zortzi burukide.

2. Aurretiaz ikusten bada aurreko puntuaren b) apartatuan aipatzen diren Euzkadi Buru Batzarreko kideetarik baten bat gutxienez bi hilabetez kanpoan egon daitekeela, aldi baterako hutsaldi hori herrialde buru batzarreko idazkariak beteko du edo, herrialde buru batzarreko buruordeak, horrelakoa dagoen kasuetan; ondorio guztietarako, ordezkioa jarduneko lehendakari gisa arituko da.

3. Euzkadi Buru Batzarreko kideek gutxienez lau urte egon behar dute alderdikideturik.

66. artikulua.— Euzkadi Buru Batzarrari honako hauek dagozkio:

a) Aberri Batzarrak hartutako erabakiak betearaztea, eta, hau batzartuta ez dagoenean, EAJ-PNVren zuzendaritza politiko orokorra egikaritzea, Aberri Batzarrari guztiaren berri emanez.

b) Alderdiaren lege-ordezkaritza.

c) EAJ-PNVren administrazioa, eta ondore horietarako:

— Itxitako ekitaldiko kontuak, aberri mailan kontsolidatuak, eta hurrengo ekitaldirako aurrekontua Ohiko Aberri Batzarrari ekitaldiko lehenengo hiru hilabeteen barruan aurkeztea, berak onets ditzan.

— EAJ-PNVren urteko kontu kontsolidatuak formulatzea, Estatuko Kontuen Auzitegian aurkezteko.

— Kontabilitate, diruzaintza, inbentario eta balantze liburuak eramatea, zeinen edukia erregelamendu bidez ezarriko den, eta une oro Alderdiaren egoera finantzarioa ezagutzeko aukera eman dezaten.

d) Alderdiaren arduradun ekonomiko-finantzarioa izendatzea, haren erregelamenduak zehazten duen prozeduraren arabera.

e) Hauteskunde-programak onestea.

f) Hauteskunde-kanpainak zuzentzea.

g) Aberri Batzarrari aberriko edota Euzkadiz kanpoko instituzioei eragiten dieten koalizioak, itunak, legegintzaldietarako akordioak eta gainerako akordio egonkorak proposatzea, Aberri Batzarrak onets ditzan.

h) Gobernu-akordio eta itun parlamentario egonkorak onestea, honako bi hauetan eragina dutenean:

— herrialde instituzio bitan edo gehiagotan,

— herrialde erakunde ezberdinetako bi udal-instituziotan edo gehiagotan,

eta horien berri albait arinen emango dio Aberri Batzarrari.

i) Agintaldiak iraungo duen aldirako jarduketa-programa Aberri Batzarrari aurkeztea, hautatuak izan eta hurrengo hiru hilabeteetan, bai eta urteroko jarduketa-planak ere.

j) Interes estrategiko nazionalakoak direlako adierazpena proposatzea herrialdearen maila gainditzen duten plan, proiektu edota ekimenetarako.

k) Gidalerro politikoak finkatzea, aberriko eta Euzkadiz kanpoko kargu publikoak orientatu, lagundu eta kontrolatzea, baita izendapeneko karguak ere, haien izendapenean, zuzenean edo zeharka, parte hartu izan dutenean.

l) Herrialde buru batzarrek egiten dituzten EAJ-PNVren giza baliabideen prestakuntza- eta plangintza-programak koordinatzea.

m) Alderdien Erregistroan eta bere webgunearen bidez Alderdiaren estatutuetan eta gobernu-organoen eta ordezkaritzaren osaeran eginiko edozein aldarazpenen berri ematea, lege ezarritako moduan eta epeen barruan.

n) *Compliance Penal* edo Delituen Prebentzio Plana eta haren aldarazpenak onestea.

ñ) e-Erakundearen funtzionamenduaren berri ematea Aberri Batzarrari.

o) Alderdikideen Erregistro Nazionalean eramatea.

p) Estatutu hauek eratzikitzen dizkioten gainerako eginkizun guztiak.

67. artikulua.— Euzkadi Buru Batzarrak bere burua zuzenduko du, berak onetsitako erregelamenduaren bidez, eta Aberri Batzarrari emango dio haren berri.

VII. TITULUA

ORGANO JUDIZIALAK, ETA BERME ETA KONTROLEKOAK

I. kapitulua **ORGANO JUDIZIALAK**

Lehenengo atala: *Aspektu orokorrak*

68. artikulua.— 1. Eginkizun judiziala egikarituko dute epaile eta epaimahaiek, batzar eskudunek aukeratuta. Horiek guztiz independenteak izango dira beren eginkizunen egikaritzan.

2. Organo judizialek eurei dagokien batzarrean aurkeztuko dute euren zuribidea, baina euren kargua prestutasunez bete dutela adierazteko bakarrik, ez, ostera, euren ebazpenen edukia aztertzeko, azken horiek aipatu besterik ez baitute egingo.

69. artikulua.— Organo judizialek izango dituzte:

- a) diziiplina-eginkizuna, eta
- b) EAJ-PNVren organoek, erregelamenduzko baldintzak bete gabe edo haien eskumenetatik kanpo, hartutako erabakien aurkako aurkaratzeak ebaztea.

70. artikulua.— Diziiplina-eginkizunean organo judizialek kontuan hartuko dituzte Justiziako Aberri Epaimahaiak emaniko ebazpenak.

Bigarren atala: *Urietako organo judizialak*

71. artikulua.— Uri erakunde bakoitzean uri epaile edo epaimahaia egongo da, eta hori osatuko dute bi urteko antzintasuneko alderdikidetza duten hiru alderdikidek; epailea edo epaimahaia urte biko aldirako aukeratuko ditu uri batzarrak.

100 alderdikiderainoko uri erakundeetan hautazkoa izango da epailea izatea. 100 alderdikidetik 300erainokoetan hautazkoa izango da epailea edo epaimahaia izatea. 300 alderdikide baino gehiagoko uri erakundeetan nahitaezkoa izango da uri epaimahaia.

72. artikulua.— Urietako organo judizialek beren uri erakundearen mailan egikaritzen dute diziiplina-eginkizuna.

Haiek ebazten dituzte euren uri erakundeko edozein alderdikideren aurkako salaketaren aurka, eta uri buru batzarrak zein uri batzarrak hartutako erabakien aurka aurkeztutako aurkaratzeak.

Uriko organo judizialaren epaia herrialdeko epaimahaian apelatu ahal izango da.

Hirugarren atala:
Herrialdeetako epaimahaiak

73. artikulua.— Herrialde bakoitzean eginkizun judiziala herrialde epaimahaiak egikarituko du, eta hori osatuko dute gutxienez hiru urteko antzintasuneko alderdikidetza duten hiru alderdikidek; herrialde batzarrak hirurok aukeratuko ditu lau urteko aldirako.

Haren antolaketa eta funtzionamendu-araubidea herrialde batzarrak arautuko ditu.

74. artikulua.— Herrialde epaimahaiaren ardurakoak izango dira:

1. Lehenengo auzialdian:

a) uri buru batzarren arteko salaketak, edo herrialde buru batzarretako kideek beren kargua egikaritzean egiten dituzten jarduketan aurka aurkeztutako salaketak;

b) uri epaileen edo uri epaimahaiko kideen aurkako salaketak, haiek euren kargua egikaritzean;

c) uriko organo judizialik ez duten uri erakundeetan azaltzen diren auzi guztiak;

d) herrialde buru batzarrak edo herrialde batzarrak hartutako erabakien aurkako aurkaratzeak.

2. Bigarren auzialdian, urietako organo judizialek emaniko ebazpenen aurkako apelazioak.

Laugarren atala:
Justiziako Aberri Epaimahaia

75. artikulua.— Aberri mailan, justizia-eginkizuna Justiziako Aberri Epaimahaiak egikarituko du, zeina osatuko baitute gutxienez lau urteko antzinasuneko alderdikidetza duten bost alderdikidek; bostok Aberri Batzarrak aukeratuko ditu lau urteko aldirako. Haren lehendakariak euskalduna izan beharko du, eta bera epaimahaiko kideek aukeratuko dute euren artean, eta haren antolaketa eta funtzionamendu-araubidea Aberri Batzarrak arautuko ditu.

76. artikulua.— Justiziako Aberri Epaimahaiaren ardurakoak izango dira:

1. Lehenengo auzialdian:

a) herrialde buru batzarren arteko salaketak, edo Euzkadi Buru Batzarreko kideek beren kargua egikaritzean egiten dituzten jarduketan aurkako salaketak;

b) herrialde epaimahaietako kideen aurkako salaketak, haiek euren kargua egikaritzean;

c) Euzkadi Buru Batzarrak, Aberri Batzarrak edo Aberri Berme eta Zaingo Batzordeak hartutako erabakien aurkako aurkaratzeak;

d) Aberri Berme eta Zaingo Batzordeak instruitzen dituen jakinarazpenak edota salaketak, *Compliance Penal* edo Delituen Prebentzio Planari dagokion aldetik.

2. Bigarren auzialdian:

a) herrialde epaimahaiek lehenengo auzialdian emandako ebazpenen aurkakoak;

b) herrialde epaimahaiek bigarren auzialdian eman baina lehenengo auzialdian emaniko ebazpenak berresten ez dituzten ebazpenen aurkakoak.

77. artikulua.— Justiziako Aberri Epaimahaiko kideak eta Euzkadi Buru Batzarra, organo gisa, Aberri Batzarrak bakarrik epaitu ahal izango ditu, auzia instruitzen duten pertsonak aurretik izendatuta.

Aberri Batzarra, eginkizun judiziala egikaritzen duenean, guztiz independentea izango da, eta haren epaitzak ezin izango dira apelatu.

78. artikulua.— Jutziziako Aberri Epaimahaiaren epaitzak ezin apelatu izango dira. Lehenengo auzialdiko ebazpenen ziozko epaitza bada, pertsona ukituak edo organo ukituak auzia berrius dadin eska dezake, epaia jakinarazi eta ondorengo 45 egunetako epean.

II. kapitulua BERMEAK ETA KONTROLA

79. artikulua.— Aberri Berme eta Zaingo Batzordea organo bat da, eta bera osatuko dute gutxienez lau urteko antzintasuneko alderdikidetza duten bost alderdikidek; bostok Aberri Batzarrak aukeratuko ditu. Batzordeburuak euskalduna izan beharko du, eta bera batzordeko kideek aukeratuko dute euren artean.

Haren antolaketa eta funtzionamendu-araubidea Aberri Batzarrak onetsitako erregelamenduaren arabera arautuko dira.

80. artikulua.— Aberri Berme eta Zaingo Batzordeak beren-beregi ditu eratzikita Alderdiaren barneko hauteskunde-prozesuak jarraitzeko eta kontrolatzeko ahalmenak, bai eta herrialdeetako zein aberriko Alderdiaren barneko kargu guztien egoera aztertzea ere estatutuen ikuspegitik, betiere bateraezintasunen sisteman ezarritakoarekin bat etorriz.

Haren irizpenak, arlo honetan, lotesleak dira, eta haien aurkako errekurtoa Justiziako Aberri Epaimahaiari bakarrik jar dakioko.

Aberri Berme eta Zaingo Batzordea da *Compliance Penal* edo Delituen Prebentzio Planari dagozkion arauak betetzen direla egiaztatuko duen organoa, eta plana kontrolatzeko atazak beteko ditu —eguneratzea, gainbegiratzea— eta kanal etikoaren bidez aurkeztuko diren komunikazioak edo salaketak instruitzeaz arduratuko da.

81. artikulua.— 1. Aberri Berme eta Zaingo Batzordeak, aldi berean:

a) aberri, herrialde zein uri eremuetako estatutu eta erregelamenduen eguneratzea zainduko du, eta horiek interpretatzerakoan kontsulta-organoa izango da, eta, egoki jotzen duenean, batzarrei proposatuko die arau horiek aldaraztea;

b) bitartekaritza-ahalmena egikarrituko du, eta alderdikideen eskubideak defendatu eta bermatzeko ahalmena egikarrituko du EAJ-PNVren alderdikideen eta organoen artean sor daitezkeen gatazketan, alde horietako batek eskatzen badio soilik;

c) berezko dituen eginkizunak egikaritzeko, aberri, herrialde zein uri eremuetako estatutu eta erregelamenduen artxibo eguneratuari eutsiko dio.

Kasu horietan guztietan, haren irizpenak gomendioak baino ez dira izango.

2. Aberri Berme eta Zaingo Batzordea legitimatuta dago, bere eskumeneko arazoetan, auzi-jartzaile gisa jarduteko organo judizialetan.

III. kapitulua

KONTU-AZTERTZAILEAK ETA

KONTU-AZTERTZAILEEN ABERRI BATZORDEA

Lehenengo atala:

Aspektu orokorrak

82. artikulua.— Uri eta herrialde erakundeetako kontu-aztertzaileak eta Kontu-aztertzaileen Aberri Batzordeak eginkizun hau dute: EAJ-PNVn eduki ekonomikoko eskubideak eta betebeharrak dakartzaten egintza eta dokumentuen kontu-hartzea eta kontabilizazioa kontrolatzea, eta horren berri ematea.

Fiskalizazio-eginkizunaren barruan, informazioa emango dute EAJ-PNVren barne-kontroleko sistema osatzen duten arau eta protokoloen egokitasunari eta betetzeari buruz.

Bigarren atala:

Urietako kontu-aztertzaileak

83. artikulua.— Urietako kontu-aztertzaileak, gehienez ere hiru, urtero hautatuko dira ohiko uri batzarrean eta, ahal dela, uri erakundeko alderdikideen artean.

Uri batzarrak ekitaldiko lehenengo bi hilabeteen barruan horiek hautatzen ez baditu, herrialde batzar eskudunari egokituko zaio urietako kontu-aztertzaileak hautatzea.

Urietako kontu-aztertzaileak urtean behin batzartuko dira gutxienez, zertarako eta itxitako ekitaldi ekonomikoari buruzko txostena egiteko, betiere ohiko uri batzarra egin aurretik. Horretarako, uri batzarrak, kontu-aztertzaileak edo kontu-aztertzaileek eskatuta, haien esku jarriko du beren fiskalizazio-eginkizuna betetzeko behar duten informazio eta dokumentazio guztia.

Txostena uri batzarrak onetsi beharko du, eta ekitaldiko lehenengo bi hilabeteen barruan uri buru batzarrak herrialde buru batzarrari bidaltzen dizkion kontuekin batera aurkeztu beharko da.

Emandako txostenak, egiturari, formari eta gutxieneko edukiari dagokienez, Kontu-aztertzaileen Aberri Batzordeak ezarritako gidalerroak errespetatuko ditu.

Hirugarren atala:
Herrialdeetako kontu-aztertzaileak

84. artikulua.— Herrialdeko kontu-aztertzaileak bi urtean behin aukeratuko dira ohiko herrialde batzarrean. Horretarako, bi kontu-aztertzaile eta bi ordezeko izendatu beharko dira.

Herrialdeko kontu-aztertzaileek beharrezko jotzen duten aldizkakotasuna zehaztuko dute, eta gutxienez urtean behin batzartuko dira, itxitako ekitaldi ekonomikoari buruzko txostena egiteko, betiere ohiko herrialde batzarra egin aurretik. Horretarako, herrialde buru batzarrak, kontu-aztertzaileek hala eskatuta, haien esku jarriko du beren fiskalizazio-eginkizuna betetzeko behar duten informazio eta dokumentazio guztia.

Txostena ohiko herrialde batzarrak onetsi beharko du, eta ekitaldiko lehenengo bi hilabeteen barruan herrialde buru batzarrak Euzkadi Buru Batzarrari bidaltzen dizkion kontuekin batera aurkeztu beharko da.

Emandako txostenak, egiturari, formari eta gutxieneko edukiari dagokienez, Kontu-aztertzaileen Aberri Batzordeak ezarritako gidalerroak errespetatuko ditu.

Laugarren atala:
Kontu-aztertzaileen Aberri Batzordea

85. artikulua.— Aberri Batzarrak aukeratuko du Kontu-aztertzaileen Aberri Batzordea, lau urteko aldirako, eta herrialde

bakoitzeko ordezkari bat aukeratuko da batzorde hori osatzeko; kide horiek, berriz, herrialde erakundeetako bakoitzaren ordezkarien artean aukeratuko dira.

Kontu-aztertzaileen Aberri Batzordeak EAJ-PNVren barne-kontrolako sistema osatzen duten arauak eta protokoloak zehaztu eta onetsiko ditu.

Kontu-aztertzaileen Aberri Batzordeak zehaztuko du zein aldizkakotasunekin batzartu behar duen, baina gutxienez hiru hileko natural bakoitza itxitaikoan batzartu beharko du.

Ekitaldia itxitaikoan, txostena egingo du Ohiko Aberri Batzarra egin aurretik. Horretarako, Euzkadi Buru Batzarrek, Kontu-aztertzaileen Aberri Batzordeak hala eskatzen dionean, haren esku jarriko du bere fiskalizazio-eginkizuna betetzeko behar duen informazio eta dokumentazio guztia.

Txostenak, egiturari, formari eta gutxieneko edukiari dagokienez, Kontu-aztertzaileen Aberri Batzordeak erakunde osorako ezarritako gidalerroak errespetatuko ditu, eta Ohiko Aberri Batzarrek onetsi beharko du.

VIII. TITULUA

KARGU PUBLIKOAK

I. kapitulua

UDALERRIETAKO KARGU PUBLIKOAK

86. artikulua.— 1. Uri Batzarrari edo udalerri bateko uri batzarrei dagokie udalerrietako karguetarako herri-hautapeneko hautagaiak aukeratzea, hots, alkate eta zinegotziak hautatzea:

a) uri buru batzar bakoitzak edo buru batzarren artekoak proposatuta, halakoa dagoen tokian;

b) herrialdeetako hiriburuetan, uri buru batzar bakoitzak edo buru batzarren artekoak, halakoa dagoen tokian, eta herrialde buru batzarrek elkarrekin proposatuta.

2. Uri batzarrek edo uri batzarrek, zati batean edo osorik, onar edo ezets dezakete proposamena, edo alderdikideek aurkeztutako beste batzuekin osa dezakete proposamen hori.

3. Herrialde batzarrek ebatziko du, hari dagokion herrialde buru batzarrek bitartekari lana eginda:

— buru batzarren artekoan, edo uri buru batzarraren edo buru batzarren artekoaren eta herrialde buru batzarraren artean akordiorik ez badago hasierako proposamenaren gainean;

— hautagaien azkeneko proposamenaren inguruan, uri batzar guztietan ahobatezko ebazpenik ez badago, hiriburuetan izan ezik; hain zuzen ere, hiriburuaren kasuan horrekin zerikusia duten batzarretako bi herenen berronespena behar da.

87. artikulua.— Uri erakundeak gidalerro politikoak finkatuko ditu, eta udalerriko kargu publikoen kudeaketa orientatu, lagundu eta kontrolatuko du, bere zuzendaritza-organoen bidez: uri buru batzarra eta uri batzarra, edo buru batzarren artekoa eta berau osatzen duten uri batzarrak.

Herrialdeetako hiriburuetan, uri buru batzarreko lehendakariak, edo, bestela, herrialde buru batzarrak izendatutako buru batzarren artekoaren kideek herrialde buru batzarrari eta, honen bidez, herrialde batzarrari jakinaraziko diete zeintzuk diren udal-kudeaketak herrialde politikan dakartzan ondorioak.

88. artikulua.— Udalerrietako kargu publikoen eskumeneko diren izendapeneko kargu guztien izendatze-proposamena aurretiaz aztertuko da uri buru batzar eskudunarekin edo buru batzarren arteko eskudunarekin, halakoa dagoen tokian. Izendapeneko karguak alderdikide ez direnean, aurretiazko onespena beharko da.

II. kapitulua HERRIALDEETAKO KARGU PUBLIKOAK

89. artikulua.— 1. Herrialde batzarrei dagokie, herrialde buru batzarrek proposatuta, herri-hautapeneko herrialdeetako karguetarako hautagaiak aukeratzea.

Herrialde buru batzarrek beren herrialde batzarrei aurkezten dizkieten proposamenak egingo dira, uri erakundeek euren batzarretan erakutsi duten gehiengoaren borondateari begirunerik handiena zainduz. Proposamen horiek jakin behar dituzte uri

erakundeek behar besteko denboraz, hautapena egin behar duten herrialde batzarrak egin aurretik.

Herrialde batzar bakoitzak, zati batean edo osorik, onar edo ezets ditzakete euren herrialde buru batzarraren proposamenak, edo beste hautagai batzuekin osa ditzakete proposamen horiek.

2. Arabako, Bizkaiko eta Gipuzkoako Batzar Nagusietarako lehendakariako hautagaiak, eta Nafarroako Foru Parlamenturako lehendakariako hautagaia, baita ahaldun nagusigaia edo Nafarroako Gobernuako lehendakariagaia, Pirinio Atlantikoetako departamentuko kontseilari nagusigaia edo Akitania Berriko erregioko kontseilarigaia ere herrialde batzar bakoitzak aukeratuko ditu, bere herrialde buru batzarrak aurkezten dituen proposamenak oinarri hartuta.

90. artikulua.— Herrialde erakundeek gidalerro politikoak finkatuko dituzte, eta euren zuzendaritza-organoen bidez orientatu, lagundu eta kontrolatuko dute herrialdeetako kargu publikoen kudeaketa.

91. artikulua.— 1. Herrialde eremuko herri-hautapeneko kargu publikoen eskumeneko diren izendapeneko kargu guztien izendatze-proposamena aurretiaz aztertuko da kasuan kasuko herrialde buru batzarrarekin.

2. Prozedura bera beteko da Administrazio publikoaren, organismo autonomoen eta ente instituzionalen izendapeneko kargu guztien izendapenean, baita ere zuzeneko edo zeharkako partaidetza duten sozietate publiko eta enpresetan.

III. kapitulua ABERRIKO KARGU PUBLIKOAK

92. artikulua.— 1. Aberri Batzarrari dagokio, Euzkadi Buru Batzarrak proposatuta, aberriko eta Euzkadiz kanpoko herri-hautapeneko karguetarako hautagaiak aukeratzea.

2. Eusko Legebiltzarrerako eta Eusko Jaurlaritzarako lehendakariagaiek euskaldunak izan beharko dute.

3. Euzkadi Buru Batzarraren proposamenak egingo dira, herrialde erakunde guzti-guztiek erakutsi duten gehiengoaren iritzia ereikiko begirunerik handiena zainduz.

Aberri Batzarrak onar edo ezets ditzake Euzkadi Buru Batzarrak egiten dizkion proposamenak, osorik edo zati batean, edo beste hautagai batzuekin osatu.

93. artikulua.— Euzkadi Buru Batzarrak eta Aberri Batzarrak finkatuko dituzte gidalerro politikoak, eta aberriko eta Euzkadiz kanpoko herri-hautapeneko kargu publikoen kudeaketa lagundu eta kontrolatuko dute.

94. artikulua.— 1. Aberriko edota Euzkadiz kanpoko eremuetako herri-hautapeneko kargu publikoen eskumeneko diren izendatze-proposamena aurretiaz aztertuko da, kasuan-kasuan, Euzkadi Buru Batzarrarekin.

2. Prozedura bera beteko da Administrazio publikoaren, organismo autonomoen eta ente instituzionalen izendapeneko kargu guztien izendapenean, baita ere zuzeneko edo zeharkako partaidetza duten sozietate publiko eta enpresetan.

95. artikulua.— Euzkadi Buru Batzarrak, herrialde buru batzarrek eta uri buru batzarrek, euren eskumenen eremuan eta Euzkadi Buru Batzarrak eta herrialde buru batzarrek elkarrekin hartutako irizpide orokorren arabera, derrigor ezarriko dituzte araubide ekonomikoa eta kargu publikoek eta izendapeneko karguek EAJ-PNVri egin beharreko ekarpenak; eta, era berean, zaindu egingo dute haiek betetzen direla, berraztertuko direla eta aldian-aldian eguneratuko direla.

Alderdikideak ez diren pertsonak izendapeneko karguak betetzeko izendatzen diren kasuetan, proposatzaileak aurkeztu beharko du proposatutakoak sinatutako idazkia; idazki horretan, proposatutakoaren konpromisoa egongo da, EAJ-PNVren ideologia, programak eta proiektu politikoa errespetatzeko, bai eta araubide ekonomikoa eta adosten dituzten diru-ekarpenak onartzeko ere. Idazki hori izendatua izan baino lehen aurkeztu beharko da.

Alderdikideen edo alderdikide ez direnen kasuan arazoren bat badago, izendapena buru batzar eskudunak baimendu beharko du.

IX. TITULUA

ALDERDIAREN BARNEKO KARGUETARAKO ETA KARGU PUBLIKOETARAKO HAUTAGAIAK AUKERATZEA

96. artikulua.— 1. Alderdiaren barneko hauteskunde-prozesuak gauzatuko dira boto unibertsal, berdin, aske, zuzen eta pertsonalaren araubidean. Botoa isilpekoa izango da, salbu eta batzar bakoitzak botoa emateko eskubidea duten bertaratutakoen arteko % 90eko gehiengo kualifikatuaren bidez beste era batekoa egitea erabakitzen badu. Erabaki hori isilpeko bozketan hartu beharko da.

2. Alderdiaren barneko karguen hautapenean, bai eta kargu publikoetarako hautagaien hautapenean ere, kontuan hartuko da unean-unean indarrean egongo diren EAJ-PNVren Emakume eta Gizonen arteko Orekarako Planean eta Euskararen Erabilera Normalizatzeko Planean xedatutakoa. Aurrekoa gorabehera, EAJ-PNVren barneko karguek eta kargu publikoek euskararen ezagutza erakutsi beharko dute beren jaiotze-data 1995etik gerozkoa bada, derrigorrezko hezkuntza euskara ofizial den herrialde historikoetan jaso badute, betiere.

Aurreko paragrafoan ezarritakoa gorabehera, uri eta herrialde erakundeek eta aberri erakundeak Alderdiaren egoera soziolinguistikoa aintzat hartuko dute, eta aurreko paragrafoan aipatu planak ahalik eta errespeturik handienarekin aplikatuko dituzte Alderdiaren barneko karguetarako eta kargu publikoetarako hautagaiak aukeratzean.

3. Botoa emateko eskubidea erabiltzerakoan ez da ezein kasutan onartuko zerrenda itxirik, ezta alderdikideei zerrenda bat osorik bozkatzeko derrigortasuna ematen dieten bideetarik ezein ere.

4. EAJ-PNVren barneko hauteskunde-prozesuak beti gauzatuko dira Aberri Batzarrak onetsitako Hauteskundeei buruzko Erregelamenduak agintzen duenaren arabera.

X. TITULUA

KARGUEN EGIKARITZAREN MUGAK

I. kapitulua

AGINTALDIEN IRAUPENA

97. artikulua.— 1. Agintaldien iraupena urte bikoia izango da uri buru batzarretako karguetarako, eta laukoa herrialdeetako eta aberriko organo betearazleetarako.

2. Aberri Batzarreko ordezkarien agintaldia Euzkadi Buru Batzarraren iraupenekoa eta aldi berekoa izango da; betiere, aldi horretan Euzkadi Buru Batzarra enkaitzen bada, ordezkariok ez diote beren karguari utziko.

98. artikulua.— Alderdiaren barneko karguak behin bakarrik berraukeratu ahal izango dira, eta agintaldi batek igaro beharko du berriro aukeratua izan ahal izateko.

Hala eta guztiz ere, kargu horiek hautatzeko eskumena duen batzarrak beren-beregi eta banan-banan egin ditzake salbuespenak berraukeratzeari jartzen zaion muga hau aplikatzerakoan.

99. artikulua.— 1. Alderdiaren barneko karguak, bera proposatzen dutenean berriro aukeratua izateko, uko egin diezaioke hautagai-izendapena onartzeari kasuan-kasuan eskuduna den organoan, Alderdiaren barneko hauteskunde-prozesuaren bigarren txandan bozkatuak izan daitezkeen hautagaien zerrenda gertatzeko unean.

2. Era berean, Alderdiaren barneko kargua edo agintea duenak uko egin diezaioke beste kargu bat onartzeari, aurreko paragrafoan ezarritako prozedura bera betez.

II. kapitulua

BATERAEZINTASUNAK

Printzipio orokorrak

100. artikulua.— EAJ-PNVk bateraezintasunaren adigaia garatzen du, ondoko printzipiook oinarri hartuta: Alderdiaren barneko

karguak eta kanpokoak banantzekoa; boterea ez metatzekoa, eta kontrolatzailea eta kontrolatua ez nahastekoa.

Lehenengo atala:
Bateraezintasun osoak

101. artikulua.— 1. Herri-hautapeneko kargu betearazleak edo EAJ-PNVtik kanpoko izendapeneko kargu betearazleak bateraezinak dira Alderdiaren barneko karguekin, herrialde eremu bereko buru batzarretan eta batzarretan, salbu eta 100 alderdikide baino gutxiagoko uri erakundeetan; horietan, uri batzarrak uri karguaren eta maila bereko kargu publikoaren arteko bateraezintasuna kendu ahal izango du.

2. Herri-hautapeneko kargu legegileak edo EAJ-PNVtik kanpoko izendapeneko kargu legegileak bateraezinak dira Alderdiaren barneko herrialde eremu bereko kargu legegileekin.

3. Honetarako, Euzkadiz kanpoko eremua aberrikotzat hartuko da.

4. EAJ-PNVko epaileak eta epaimahaietako kideak, eta Aberri Berme eta Zaingo Batzordeko kideak bateraezinak dira beraien artean, eta Alderdiaren barneko beste edozein kargurekin edo kargu publiko batekin.

5. Kontu-aztertzaileak bateraezinak dira Alderdiaren barneko erakundearen kargu betearazleekin, baldin eta haren ekitaldi ekonomikoaren gaineko txostena eman behar badute.

6. Herrialde buru batzarrei edo Euzkadi Buru Batzarrari atxikitako langile aktiboak bateraezinak dira Alderdiaren barneko herrialde eta aberri eremuetako edozein kargurekin.

Bigarren atala:
Alderdiaren barneko karguen arteko bateraezintasunak

102. artikulua.— 1. Herrialde buru batzarreko burukidea eta honako hauek bateraezinak dira:

a) Uri buru batzar bateko burukidea edo uri erakunde batek izendatutako buru batzarren artekoaren kidea, salbu eta herrialde batzarrak bateraezintasuna kentzen badu.

b) Euzkadi Buru Batzarreko burukidea, herrialde buru batzarretako lehendakariak izan ezik, horiek Euzkadi Buru Batzarreko berenezko kideak baitira.

- c) Herrialde batzarreko ahalduna.
- d) Aberri Batzarreko ordezkaria.
- 2. Euzkadi Buru Batzarreko burukidea eta honako hauek bateraezinak dira:
 - a) Herrialde batzarreko ahalduna.
 - b) Aberri Batzarreko ordezkaria.
- 3. Herrialde batzarreko ahalduna izatea eta Aberri Batzarreko ordezkaria izatea bateraezinak dira.

Hirugarren atala:

Alderdiaren barneko karguen eta kargu publikoen arteko bateraezintasunak

103. artikulua.— 101. artikuluan azaldutako kasuez gain:

- 1. Uri buru batzar bateko burukidea edo buru batzarren artekoaren kidea eta honako hauek bateraezinak dira:
 - a) zinegotzi, zuzendari, kabineteburua, edo udalerri bereko udaleko maila bereko beste edozein kargu betearazle;
 - b) ahaldun nagusia edo foru-diputatua, edo Nafarroako Foru Gobernuko lehendakaria edo kontseilaria, edo Pirinio Atlantikoetako departamentuko edo Akitania Berriko erregioako kontseilari nagusia;
 - c) Eusko Jaurlaritzako Lehendakaria edo sailburua;
 - d) espainiar estatuko Gorte Nagusietako diputatua edo senataria, edo frantziar estatuko Parlamentuko diputatua;
 - e) Europar Parlamentuko parlamentaria.
- 2. Herrialde buru batzarreko burukidea eta honako hauek bateraezinak dira:
 - a) 20.000 biztanletik gorako udalerrietako alkatea;
 - b) 20.000 biztanletik gorako udalerrietako zinegotzia, salbu eta EAJ-PNV ez badago Gobernu Batzordean; horrelakoetan, herrialde batzarrak erabaki dezake bateraezintasuna kentzea;
 - c) Eusko Jaurlaritzako Lehendakaria edo sailburua;
 - d) Eusko Jaurlaritzako sailburuorde, idazkari nagusi, zuzendari edo maila bereko edozein kargu betearazle, salbu eta herrialde batzarrak bateraezintasun hori kentzea erabakitzen badu;
 - e) herrialde historikoko Batzar Nagusietako batzarkidea, edo Nafarroako Foru Parlamentuko parlamentaria, salbu eta herrialde batzarrak bateraezintasuna kentzea erabakitzen badu;
 - f) Eusko Legebiltzarreko parlamentaria, salbu eta herrialde batzarrak bateraezintasuna kentzen badu;

g) estatuko Gorte Nagusietako diputatua edo senataria;

h) Europar Parlamentuko parlamentaria.

3. Euzkadi Buru Batzarreko burukidea eta honako hauek bateraezinak dira:

a) 20.000 biztanletik gorako udalerrietako alkatea edo zinegotzia;

b) ahaldun nagusia edo foru-diputatua, edo Nafarroako Foru Gobernuako lehendakaria edo kontseilaria, edo Pirinio Atlantikoetako departamentuko edo Akitania Berriko erregioko kontseilari nagusia;

c) foru-aldundietako edo Nafarroako Gobernuko zuzendari, zuzendari nagusi, kabineteburu edo maila bereko edozein kargu betearazle, salbu eta Aberri Batzarrak bateraezintasun hori kentzea erabakitzen badu;

d) Eusko Legebiltzarreko parlamentaria, salbu eta Aberri Batzarrak bateraezintasun hori kentzen badu;

e) estatuko Gorte Nagusietarako diputatua edo senataria;

f) Europako parlamentuko diputatua.

104. artikulua.— EAJ-PNVko kargu betearazleak bateraezinak dira sindikatuen edo enpresen erakundeen barneko antzeko karguekin.

105. artikulua.— 101. artikuluan azaldutako kasuez gain:

1. Herrialde batzarreko ahalduna eta honako hauek bateraezinak dira:

a) Eusko Jaurlaritzako Lehendakaria edo sailburua;

b) espainiar estatuko Gorte Nagusietako diputatua eta senataria, eta frantziar estatuko Parlamentuko parlamentaria;

c) Europar Parlamentuko parlamentaria.

2. Aberri Batzarreko ordezkaria bateraezina da ahaldun nagusiarekin edo foru-diputatuarekin, edo Nafarroako Foru Gobernuako lehendakariarekin edo kontseilariarekin.

106. artikulua.— Kapitulu honek bateraezintasunei buruz dioenaren ondoretarako:

1. Eusko Jaurlaritzako sailei datxekzien ente, organismo, institutu edo sozietateetako zuzendari eta kudeatzaileak berdinetsiko dira estatutu hauen 103. artikuluko 3.c) apartatuan aipatutako karguekin.

2. Foru-sailei datxekien ente, organismo, institutu edo sozietateetako zuzendari eta kudeatzaileak berdinetsiko dira estatutu hauen 103. artikuluko 2.d) apartatuan aipatutako karguekin.

3. Udal edo udalez gaindiko sozietate, enpresa edota ente publikoetako zuzendari eta kudeatzaileak berdinetsiko dira estatutu hauen 103. artikuluko 1.a) apartatuak aipatzen dituen izendapeneko karguekin.

107. artikulua.— Izendapeneko kargu baterako izendatuak diren Alderdiaren barneko kargu guztiek Aberri Berme eta Zaingo Batzordeari jakinarazi beharko diote egitate hori, izendapena benetan gertatzen denetik astebeteko epean.

Kentzeko moduko bateraezintasuna badago, Aberri Berme eta Zaingo Batzordeak berehala emango dio horren berri Alderdiaren barneko organo betearazle eskudunari, estatutuetan ezarritakoaren arabera, alderdikideei iritzia eskatzeko prozesuari hasiera emateko.

Laugarren atala:
Bateraezintasunak kentzea

108. artikulua.— 1. Bateraezintasuna ezin izango zaie kendu Alderdiaren barneko organo betearazle bateko kideen % 40ri baino gehiagori.

2. Bateraezintasuna kendu beharra dakarten kideen kopurua handiagoa bada aurreko apartatuan ezarritako mugak baimendutakoa baino, orduan hautetsi izaera galduko dute boto kopuru gutxien lortu dutenek.

3. Inguruabar hau Euzkadi Buru Batzarreko kideak hautatzean gertatzen bada, 1. apartatuan ezarritako % 40ko muga osatzeko lehentasuna izango dute herrialde buru batzarretako lehendakariak, eta orduan Aberri Batzarrak berak ebatziko du Aberri Batzarrak aukeratutako burukideetatik nori edo nortzuei kenduko zaien bateraezintasuna eta hautetsiak izaten iraun.

109. artikulua.— Bateraezintasuna kentzea onetsi edo ezetsi beharko da 45 eguneko gehieneko epean, bateraezintasun hori sortzen den egunetik zenbatuta.

Organo betearazle bakoitzak alderdikideei iritzia eskatzeko prozesurako bidea hasiko du, hala badagokio.

110. artikulua.— Aurreko artikuluan aipaturiko epea igaro ondoren, edo bateraezintasuna kentzea ezetsi bada, bateraezintasuna duenak, bost eguneko epean, adierazi beharko dio organo betearazle eskudunari, kargu publikoari uko egiten dion, edo bera hautatu zuen batzarrari aurkezten dion Alderdiaren barneko kargurako dimisioa edo ukoa. Onarpena edo ezespena, gehienez, 30 eguneko epean ebatzi beharko da.

111. artikulua.— Alderdiaren barneko organo betearazleak berriztatzeko, aurkezten badira hautagai batzuk, eurak hautatuz gero, bateraezinak suertatzen direnak, orduan inguruabar hori beren-beregi agerraraziko da, eta, aukeratuak badira, aukeratze horrek berez dakar bateraezintasuna kentzea, baldin eta bateraezintasun hori kendu ahal bada, alderdikideei iritzia berriro eskatu beharrik gabe.

112. artikulua.— 1. Bateraezintasunak kendu ahal izango dira estatutuetan ezarritako kasuetan bakarrik; eta, nolanahi ere, pertsona bakoitzeko eta beren-beregi erabaki beharko da.

2. Bateraezintasuna sortzen bada Alderdiaren barneko kargu bat eta kargu publiko bat aldi berean betetzeagatik, orduan bateraezintasuna kendu beharko du Alderdiaren barneko kargua betetzeagatik erantzuna jaso behar duen batzarrak.

Hala eta guztiz ere, herrialde buru batzar bateko lehendakari batek egikaritzen badu, aldi berean, Eusko Legebiltzarreko parlamentariaren kargua, orduan, Euzkadi Buru Batzarreko kidea izateagatik duen bateraezintasuna kentzea herrialde batzar eskudunak ebatziko du.

III. kapitulua KARGUAK EZ METATZEA

113. artikulua.— Aberri, herrialde eta uri batzarrek, euren eskumenaren eremuan, zainduko dute pertsona batek karguak ez metatzearen gaineko araua betetzen dela. Horretarako, eurek egoki jotzen dituzten erabakiak hartu eta arauak emango dituzte, eta horiek eta Aberri Berme eta Zaingo Batzordeak eskatzen dizkien datu guztiak eskuratuko dizkiote, horrek azter dezan Alderdiaren

barneko kargu guztiek betetzen dutela estatutuetan ezarritako egoera.

XI. TITULUA

EAJ-PNVren ANTOLAKETA EKONOMIKOA

114. artikulua.— 1. EAJ-PNk gaitasun juridiko osoa du, bere ondasun eta eskubideak eskuratu, besterendu eta haien gainean beharrezko jotzen dituen xedapen-egintzak egiteko, haren zuzendaritza-organismoek euren eskumenen eremuaren barruan erabakitakoaren arabera.

2. EAJ-PNVren ondarea uri, herrialde eta aberri erakundeen, Euzkadiz kanpoko erakundeen eta Euzko Gaztediren ondasunek, eskubideek eta betebeharrek osatzen dute, baita haien mendeko organismo, erakunde eta sozietateen ondareak, eta aurreko guztiei lotutako fundazio eta elkarten ondareak ere.

3. Euzkadi Buru Batzarrak arauak zehaztu eta onetsiko ditu, zeinen bitartez eraentzen baitira herrialde buru batzarren ogasunak eta haiei dagozkien uri erakundeetako, Euzkadiz kanpoko erakundeetako eta Euzko Gaztediko ogasunak.

4. Kontu-aztertzaileen Aberri Batzordeak erabaki eta onetsiko ditu EAJ-PNVren barne-kontroleko arau eta protokoloak. Arau eta protokolo horien egokitasunaz eta betetzeaz urtero informatuko dute beren txostenetan Kontu-aztertzaileen Aberri Batzordeak, herrialdeetako kontu-aztertzaileek eta urietako kontu-aztertzaileek.

5. EAJ-PNVren ondarearen osagaiak dira:

- edozein tituluren bidez eskuratu diren edo eskuratuko diren ondasunak, higigarriak zein higiezinak;
- alderdikidetzaren ohiko kuotak eta ezohikoak, nahitaezkoak izan edo borondatezkoak izan;
- alderdikideen eta alderdizaleen ekarpenak;
- herri-hautapeneko eta izendapeneko kargu publikoek derrigor eman behar dituzten kopuruak, haiek alderdikideak izan edo ez;
- jasotzen diren jaraunspen eta legatuak;
- jasotzen diren dohaintzak eta eskuzabaltasunak;

— Alderdiaren beraren jardueren etekinak eta Alderdiaren egoitzetan tradizioz egiten izan diren jardueren etekinak, Alderdiaren ondarearen kudeaketatik eratorritako diru-sarrerak, sustapen-jardueretatik datozen mozkinak, eta EAJ-PNVk bere helburu espezifikoetarako eman ahal dituen zerbitzuetatik lor daitezkeenak, zeinak zuzenean edo haren mendeko organismo, erakunde eta sozietateen bidez lortzen diren;

— hauteskunde-gastuak eta EAJ-PNVren ohiko funtzionamendu-gastuak finantzatzeko ematen diren dirulaguntza publikoak, bai eta legez ezarri ahal diren ohiz kanpoko dirulaguntzak;

— EAJ-PNVren jarduera instituzionaletik datozen diru-sarrerak, eta bereziki ganbera ezberdinetan, batzar legegileetan, Batzar Nagusietan eta toki-administrazioetako organoetan eratutako taldeetatik eratorriak;

— mailegu edota kreditu itunduetatik datozen funtsak.

115. artikulua.— 1. Euzkadi Buru Batzarrak Ohiko Aberri Batzarrean ekitaldi bakoitzaren emaitza ekonomiko-finantzario kontsolidatuaren berri emango du, Kontu-aztertzaileen Aberri Batzordeak nahitaez egin beharreko txostena aurkeztu ondoren, eta Aberri Batzarrean aurkeztuko du urteko aurrekontua, batzarrak onetsi dezan.

2. Kontuak ematean honako hauek aurkeztuko dira: Euzkadi Buru Batzarraren eta herrialde buru batzarren urteko galera-irabazien kontua eta egoera balantzea.

Ondorio horietarako, ekitaldiko lehenengo bi hilabeteen barruan eta Ohiko Aberri Batzarra egin baino lehen, herrialde buru batzarrek Euzkadi Buru Batzarrari urteko kontuak bidali beharko dizkiote, zeinetan haien herrialdeko uri erakundeenak sartzen diren. Herrialde buru batzarren urteko kontuekin ere herrialde bakoitzeko kontu-aztertzaileek nahitaez egin beharreko txostenak bidaliko dira.

Euzkadiz kanpoko erakundeek eta Euzko Gaztedik kontuak bidali beharko dizkiote Euzkadi Buru Batzarrari bi hilabeteko epe berean.

3. Uri erakundeek beren kontuak onetsi eta herrialde buru batzarrari bidali beharko dizkiote ekitaldiko lehenengo bi hilabeteen barruan eta ohiko herrialde batzarra egin baino lehen.

4. Urietako eta herrialdeetako erakundeek, aberri-erakundeak eta, hala behar denean, Euzkadiz kanpoko erakundeek eta EGik beren mendean dauden organismo, erakunde, fundazio, elkarte eta

sozietateei urteko kontuak eskatu ahal izango dizkiete. Kontu horiek derrigor bidali beharko dira, ekitaldia itxi eta ondorengo hiru hilabeteetako epearen barruan, mendekotasun edo lotura organikoa denean edota indarrean dagoen legeriak hala eskatzen duenean.

116. artikulua.— 1. Euzkadi Buru Batzarra, EAJ-PNVren zuzendaritza-organo nagusia da, eta bera da erantzule subsidiarioa Estatuko Kontuen Auzitegiaren aurrean hauek direla-eta: Alderdiaren egoera finantzario guztiak, eta ekitaldi ekonomiko bakoitzeko urteko kontuak, betiere nahitaezkoa den kontsolidazio-mailan eta legez ezarritako epeen barruan.

2. Euzkadi Buru Batzarrarena izango da haren webgunean edukiak argitaratzeko erantzukizuna, eta hori egingo du Alderdiak bere jarduketa-planean, gardentasun eta gobernu onaren arloan, ezartzen dituen helburuak oinarri hartuta.

3. EBBk bere erregelamenduan zehaztuko du zein den kontabilitate-liburuak eramateko araubidea, betiere EAJ-PNVren estatutuetan xedatutakoaren arabera eta kasuan-kasuan aplikagarri den legeriaren arabera.

117. artikulua.— 1. Aberri Batzarraren erabaki batek finkatuko ditu uri erakundeek euren herrialde erakundeei eta hauek aberri-erakundeari eman beharreko gutxieneko diru-ekarpenak; izan ere, ekarpenok alderdikideen ordainketetatik edota beste diru-sarreretatik kenduko dira.

2. Nolanahi ere, uri erakundeek buru batzarren artekoan, herrialde batzarrean edo Batzar Nagusian duten ordezkartasuna, eta herrialde erakundeek Aberri Batzarrean duten ordezkartasuna badago haiek osatzen dituzten alderdikideen kopuruaren arabera, orduan benetan ordaindu eta abenduaren 31n kontabilizatuta dauden kuoten kopurua bakarrik hartuko da kontuan. Ordezkaritasun hori orduantxe geldituko da finkatuta urte osorako.

118. artikulua.— EAJ-PNVren buru batzarrei beren-beregi dagokie Alderdiaren ondarearen defentsa eta kudeaketa.

XII. TITULUA

KOMUNIKABIDEAK ETA

IRUDIAREN BITARTEKOAK

119. artikulua.— Euzkadi Buru Batzarrari dagokio EAJ-PNVren komunikabideen eta irudiaren bitartekoen politika orokorra.

Herrialde buru batzarrei dagokie EAJ-PNVren komunikabideen eta irudiaren bitartekoen politika, betiere haien herrialdeari dagozkion arazoetan, bai eta Euzkadi Buru Batzarraren erabakiak hartan betearaztea ere.

Uri buru batzarrari dagokio EAJ-PNVren komunikabideen eta irudiaren bitartekoen politika, haren udalerriri dagozkion arazoetan, bai eta herrialde buru batzarren erabakiak hartan betearaztea ere.

120. artikulua.— Euskara izango da adierazpenetan eta prentsaurrekoetan lehentasunez erabiliko den hizkuntza.

XIII. TITULUA

ABERRI ESTATUTUEN ERREFORMA

121. artikulua.— Aberri Estatutuak erreformatzeko, honako hauek behar dira:

1. Euzkadi Buru Batzarrak ekitea, bai bere ekimenez, bai honako hauek eskatuta:

- a) Aberri Batzarrak.
- b) Aberri Berme eta Zaingo Batzordeak.
- c) Herrialde batzar batek.
- d) Herrialde buru batzar batek.
- e) Aberri Batzarreko hogeitaz batzuek edo herrialde erakunde batek Aberri Batzarrean dituen ordezkaritza guztiek.

f) EAJ-PNVren uri erakundeen bostenak edo alderdikideen bostenak.

2. Erreforma-proiektuan beren-beregi adieraztea estatutuatarako proposatzen diren aldarazpenak.

3. Aberri Batzarrak gehiengo osoaz onets dezala, alderdikideei iritzia eskatu ondoren.

4. Batzar Nagusiak berronestea bertan egon eta botoa emateko eskubidea dutenen gehiengo osoaz.

XEDAPEN GEHIGARRIAK

LEHENENGOA.— Aberri Batzarrak, EAJ-PNVren erakundeak eragin eta biziberritze aldera, barkatu ahal izango die erakundeari, estatutu hauetako artikulua batzuk ez betetzea, baldin eta hori beharrezkotzat hartzen badu, Euzkadi Buru Batzarrak helburu horretarako Aberri Batzarrari aurkezten dizkion jarduketaren planak garatu eta beteazteko.

BIGARRENA.— EBBk EAJ-PNVren Aberri Estatutuaren alderdi politikoen arloan indarrean dagoen legeriak eta unean-unean aplikagarri izango den legeriak ezarritako behar besteko aldarazpenak egin ahal izango ditu, eta horren berri emango dio Alderdiaren Aberri Batzarrari. Aldarazpen horiek balio osoa izango dute harik eta organo eskudunak berronetsi arte.

Xede horretarako, Euzkadi Buru Batzarrak EAJ-PNVren Aberri Batzarra presaz deituko du, eginiko aldarazpena onetsi dezan edo ezetsi dezan.

HIRUGARRENA.— EAJ-PNVren desegitea gertatuz gero, Aberri Batzarrak, une horretan aberri eremuan eginkizunak betetzen dituen Kontu-aztertzaileen Aberri Batzordearen kontrolpean, ondarea likidatzeari ekingo dio inolako organismo edo agintaritzaren esku-hartzerik gabe, eta ondoren geratuko den azken ondare likidoa Alderdiaren helburuekin zuzenean edo zeharka zerikusia duen baina irabazi-asmorik ez duen edozein erakunderi eratziki ahal izango dio.

AZKEN XEDAPENAK

LEHENENGOA.— Estatutu hauetan alderdikideentzat aipatzen diren eskubide-murrizketa guztiek ondoreak ekarriko dituzte estatutuok onetsi eta berronetsi ondoren, eta ez dira kontuan hartuko ordu arte izandako inguruabarrak.

BIGARRENA.— Estatutu hauek indarrean jarriko dira Batzar Nagusiak berak berronesten dituen egun berean.

E R A N S K I N A K

IKURRA: Haren ikurra bi elementuk osatzen dute eta hauek dira: anagrama edo koloreko bola eta logotipoa, EAJ-PNV hitzak osatua; EAJ-PNV markaren inguruan ikurra babesteko zuriunea izango du eta ez du inolako elementu eraldatzaile ikusgarriarik izango, ez testurik, ez marrazkirik ezta apaingarririk ere. EAJ-PNVren ikusirudiak haren historia osoan ordezkatu duten betiko kolore berde, zuria eta gorria izango ditu. Anagramak berdetik gorrira doan degradatua eramango du eta logotipoak kolore beltza izango du.



Bozketa-orrietan erabiltzeko, baimenduta dago kolore bakarreko bertsio beltza erabiltzea, koloreak tinta bakararekin ordezkatzen ditu, eta positiboan edo negatiboan joan daiteke.

SIGLAK: EAJ-PNV

WEBGUNEA ETA POSTA

ELEKTRONIKOKO HELBIDEA: Webgunea www.eaj-pnv.eus da.
Posta elektronikoko helbidea da:
ebb.idazkaritza@eaj-pnv.eus

BATERAEZINTASUNEN LAUKIA

UUEE. Uri buru batzarren artekoa			Bai	Kentzeko modukoa	Ez	Ez	Ez	Osoa	
			Herrialde Batzarra						
Herrialde buru batzarrak	Bai	Kentzeko modukoa			Osoa	Osoa	Osoa	Osoa	
	Herrialde Batzarra				Lehendakariak izan ezik				
Euzkadi Buru Batzarra	Ez		Osoa		Lehendakariak izan ezik	Osoa	Osoa	Osoa	
Herrialde Batzarreko ahalduak	Ez		Osoa						Osoa
Aberri Batzarreko ordezkariak	Ez		Osoa		Osoa	Osoa		Osoa	
Epailleak, epaimahaiak eta ABZB	Osoa		Osoa		Osoa	Osoa	Osoa		
	UUEE. Uri buru batzarren artekoa		Herrialde buru batzarrak		Euzkadi Buru Batzarra	Herrialde Batzarreko ahalduak	Aberri Batzarreko ordezkariak	Epailleak, epaimahaiak eta ABZB	
Alkatea eta zinegotziak < 20.000 biztanle	Osoa UE > 100 alderdikide		Ez		Ez	Ez	Ez	Osoa	
	Uri Batzarra UE < 100 alderdikide								
Alkatea > 20.000 biztanle	Osoa UE > 100 alderdikide		Osoa		Osoa	Osoa	Ez (hiriburuak izan ezik)	Osoa	
	Uri Batzarra UE < 100 alderdikide								
Zinegotziak > 20.000 biztanle	Osoa UE > 100 alderdikide		Osoa (gobernuan)		Osoa	Osoa	Ez (hiriburuak izan ezik)	Osoa	
	Uri Batzarra UE < 100 alderdikide		Herrialde Batzarra (oposizioan)						
Zuzendaria, kabineteburua edo kargu baliokidea udalean (+ 106.1 art.)	Osoa		Ez		Ez	Ez	Ez	Osoa	
Ahaldun nagusiak eta foru-diputatuak, Nafarroako Gobernuko lehendakaria eta kontseilariak, eta Pirinio Atlantikoetako eta Akitania Berriko kontseilaria	Osoa		Osoa		Osoa	Osoa	Osoa	Osoa	
Zuzendaria, zuzendari nagusia, kabineteburua edo baliokidea foru-aldundietan edo Nafarroako Gobernuan (+ 106.2 art.)	Ez		Osoa		Bai	Kentzeko modukoa	Osoa	Ez	Osoa
					Aberri Batzarra				
Eusko Jaurlaritzako Lehendakaria eta sailburuak, Akitania Berriko Erregioko kontseilaria	Osoa		Osoa		Osoa	Osoa	Osoa	Osoa	
Sailburuordea, idazkari nagusia, zuzendaria edo baliokidea Eusko Jaurlaritzan (+ 106.3 art.)	Ez		Bai	Kentzeko modukoa	Osoa	Ez	Osoa	Osoa	
			Herrialde Batzarra						
Batzar Nagusiak eta Nafarroako Parlamentua	Ez		Bai	Kentzeko modukoa	Ez	Osoa	Ez	Osoa	
			Herrialde Batzarra						
Eusko Legebiltzarra	Ez		Bai	Kentzeko modukoa	Bai	Kentzeko modukoa	Ez	Osoa	Osoa
			Herrialde Batzarra		Aberri Batzarra				
Kongresua, Senatua, frantziar estatuko Parlamentua eta Europar Parlamentua	Osoa		Osoa		Osoa	Osoa	Osoa	Osoa	

Bateraezintasunen laukian ez dira kontu-hartzaileak agertzen, ez eta herrialde buru batzarrei edo Euzkadi Buru Batzarrari atxikitako langile aktiboak ere; izan ere, horiek Aberri Estatutuen 101. artikuluko 5. eta 6. apartatuetan ageri dira hurrenez hurren.